

الشخصيات

دجال
مساعد الشيخ هدهد

المأمور
ضابط المباحث
عامل البوفيه
الساعي
صحفي
صحفي
صاحب مطعم اسماك
مأمور ضرائب
صبي المقهى

مخبر
مخبر

شباب المقهى

دجال
دجال
دجالة
دجالة

- ١- الشيخ هدهد
 - ٢- فاصوليا
 - ٣- مدير الأمن
 - ٤- على
 - ٥- فؤاد
 - ٦- إبراهيم
 - ٧- فرج
 - ٨- عباس بلطية
 - ٩- زكريا منسى
 - ١٠- المعلم أبو جابر
 - ١٢- حناطة
 - ١٣- رابسو
 - ١٤- الصول مصطفى
 - ١٥- عتريس
 - ١٦- فتحي
 - ١٧- جابر
 - ١٨- رمضان
 - ١٩- أحمد
 - ٢٠- حسن أبو الدواهي
 - ٢١- فتوح النتن
 - ٢٢- زيطة العايقة
 - ٢٣- هديات
 - ٢٤- الفساد الأكبر
 - ٢٥- فتنة
 - ٢٦- إغراء
 - ٢٧- خيانة
 - ٢٨- أنانية
 - ٢٩- شهوة
 - ٣٠- الكذب
 - ٣١- النفاق
 - ٣٢- الخداع
 - ٣٣- انحراف
 - ٣٤- التسبب
 - ٣٥- الجشع
 - ٣٦- الحقد
- مغنيات
راقصات
الزمان : هنا
المكان : هنا

الفصل الأول

قاعة واسعة فى مكتب مدير الأمن ، منضدة طويلة وحولها مجموعة من المقاعد ، على الحائط خريطة كبيرة الحجم لأحياء البلدة ، وبجوارها علم منتصب ، الستائر مسدلة على النوافذ ٠٠٠ يدخل العامل ويقف مترددا وينظر فى أرجاء القاعة وإلى السقف وتحت المنضدة ، يخطو داخل القاعة متلفتا حوله ، يخرج الفوطة من جيبه وينظف سطح المنضدة ، يدخل وراءه عامل البوفيه حاملا عبوات المياه المعدنية فوق صينية .

- عامل البوفيه : (يصف عبوات المياه) صباح الخير يا عم فرج
 فرج : (منتفضا) حرام عليك يا أخى ... اتق الله ، الواحد جتته متلبشة ، وما عدش يستحمل ، كده برضة يا إبراهيم تفرزنى
 إبراهيم : (مندهشا) مالك يا عم فرج؟! أنت تعبان ولا إيه
 فرج : (يجلس ويخرج منديله ويمسح به عرقه) هو فيه حد فى البلد مش تعبان ... هو اللي بيحصل مش بدمتك غريب ؟
 إبراهيم : (يواصل وضع عبوات المياه على المنضدة) قصدك المصابيب و البلاوى اللي نازلة زى المطر على الناس .. يا عم قول يا باسط .. يا ما دقت على الراس طبول ما حدش واخذ منها حاجة .
 فرج : ايوه يا إبراهيم ، بس إيه السبب فى اللي بيحصل ؟ كل يوم وكل ساعة مصابيب وكوارث .
 إبراهيم : (يتوقف مفكرا) قلة تقى ... الناس ماعدش عندها ضمير .. زى السمك بياكل فى بعضه
 فرج : حكاية السمك والجمبرى دى من زمان يا إبراهيم ، الحكاية زادت وغطت ، السجون مليانة بالخلق ، والمستشفيات ، السرقة النهب والاعتصاب والقتل والأمراض ، والوبيا فى النبات والحيوان والإنسان الناس ما عدتش طايقة حتى هدمها ، الرجالة بيطلقوا نسوانهم،النسوان بتقتل رجالتها و.....
 إبراهيم : (مقاطعا ، يخرج علبة سجانره ويقدم واحدة لفرج) ما هو ده يا عم اللي عايشين فيه طول عمرنا ... الناس اتغيرت ما عدتش زى زمان كل واحد عايز يدوس على رقبة التانى ويمص دمه ، واللى بيحصل للناس ده انتقام من ربنا ... خد دخن السيجارة المعتبرة دى ، وأنا ح أعمل لك فنجان قهوة تضبط به دماغك الخريان ده .
 فرج : (يرد يده بالسيجارة) لا يا إبراهيم ، فيه حاجة ورا المصابيب والبلاوى اللي بتحصل فى البلد .
 إبراهيم : (يشعل سيجارته) ح يكون فيه إيه يعنى ، لو كان فيه حاجة إحنا أول أول ناس ح نعرفها ، أنت ناسى ولا إيه ، إحنا فى مديرية أمن البلد كلها
 فرج : (يتلفت حوله ويشير إلى إبراهيم أن يقترب ويسر له بشئ)
 إبراهيم : (ينفجر ضاحكا ويضرب على كتف فرج) البلد راكبها عفريت ... دا كلام ناس عاقلة تقوله يا عم فرج الظاهر المعسل اللي بدخنه فى قهوة (العفش) امبارح كان فيه حاجة ... ولولا إنى عارف أنك ما بدخنهوش كنت قلت إنك دخنت من الصنف المضروب اللي نزل البلد اليومين دو مع أنه يا أخى طعمه مش بطل
 فرج : (غاضبا ومحدرا) الحكاية ما فيهاش هزار ولا ضحك ... كل الناس بتقول الكلام ده .
 إبراهيم : (ضاحكا) بس أنه عفريت اللي ح يقدر على البلد دية ؟ قول عفاريت عصابة ، جيش من العفاريت ، دا كل واحد عايز له عفريت ، مراتى لوحدنا عايزه عشر عفاريت علشان يقدرنا ينظطوها ، وحماتى عايزة عشرين عفريت علشان يشقلبوا كيانها .. يا عم إحنا شعب فراغة ما نتأثرش بالعفاريت ولا الجن .
 فرج : (ناظرا فى ساعته) ميعاد الاجتماع قرب ، والباشا على وصول .
 إبراهيم : (ينجح إلى الباب) بسرعة ح أحضر فنجان القهوة لسعادة الباشا (يعود ثانيا) إنما الاجتماع ده بسبب إيه يا عم فرج ؟
 فرج : (غاضبا) ألف مرة قلت لك ما تدخلش فى اللي ما لكش فيه .
 إبراهيم : حاضر يا عم فرج ... أمرك يا عم فرج .
 فرج : (متعجبا) واقف ليه ؟

إبراهيم

فرج

إبراهيم

فرج

: علشان تقول لى الاجتماع ده ليه ؟
: أنا سمعت طرايطيش كلام كده والله أعلم ح يتكلموا فى حالة الناس واللى بيحصل فى البلد
(غاضبا) الله .. أنا قلت لك ألف مرة ما تدخلش فى اللى مالکش فيه
: (يخرج) الرجل عقله راح خلاص .. قال البلد راكبها عفريت .. دا كلام ناس عاقلين
: (يخرج) استرها معنا يارب .

(يدخل عدد من رجال الأمن فى ملابسهم الرسمية ويجلس كل منهم فى مقعده يدخل مدير الأمن ، يقف الرجال .. يشير لهم بالجلوس)

مدير الأمن

: (متفقدا الجميع بنظره ، ثم يفتح ملفا أمامه ويناول كل واحد ورقة بيضاء) طبعا تقدروا تخمنوا أنا مجتمع بيكم النهاردة ليه ، أنتم عايشين فى البلد وأكثر ناس عارفين اللى بيحصل ... البلد مش فى حالة طبيعية يا سادة .. نسبة الجرائم على مختلف أنواعها تعددت كل الحدود .

ضابط (١)

: إحنا يا سعادة الباشا بنبذل كل ما فى وسعنا ، أنا ما روحتش بيتى من أسبوع ، وبنام صاحى فى القسم

مدير الأمن

: (ساخرا) وإنك ما روحتش بيتك من أسبوع حل المشكلة ؟

ضابط (٢)

: وإيه فى إيدنا نعمله .. بصراحة الوضع خرج عن سيطرتنا .

مدير الأمن

: (يقف غاضبا) والله .. الوضع خرج عن سيطرتنا .. وهو تحت سيطرة مين دلوقت ؟

(يضرب سطح المنضدة بيده) دا اسمه عجز وتقصير واهمال يا حضرات .. لابد يكون فيه تفسير للى بيحصل البلد على حافة الانهيار .. وأنا مجتمع بكم علشان تقدموا لى تفسير وسبب عن كل اللى بيحصل (يجلس) شوفوا .. قدام كل واحد ورقة بيضا .. قبل ما تخرجوا من هنا كل واحد يكتب استقالته وتقعدها فى بيوتكم ... المفروض إنكم مسنولين عن الأمن والاستقرار فى البلد وحاليا لا فيه أمن ولا استقرار ، إذن مالكمش لزمة ولا فائدة .

ضابط (٣)

: أنا حاسس إن فيه مؤامرة على البلد من جهات أجنبية .

مدير الأمن

: (ضاحكا فى سخرية) والله ... حاسس ومؤامرة .. ومن جهات أجنبية . والمؤامرة دى بتخلى الناس تنتحر ، والجزارين يجروا ورا الناس بالسكاكين ، والستات ترمى زيت مغلى على الناس فى الشوارع ، والرجالة تطلق نسوانهم بدون سبب ، والنسوان يأكلن درعات الرجالة ، ويقطعن حاجات تانيه حساسة ... مؤامرة إيه يا حضرة الضابط ؟

ضابط (٤)

: يمكن زميلى ايقصدش مؤامرة بالمعنى الحرفى ، يمكن فيه حاجة مرشوشة فى الهواء ، أو موضوعة فى الماء ، أو الأكل بتخلى الناس يعملوا العمال دى .

مدير الأمن

: كل ده اتحلل .. ما لقتاش حاجة بالمرّة .. فكرة المؤامرة دى مالهاش أى أساس (تسود فترة صمت) الظاهر ده ح يكون آخر اجتماع لكم هنا .. وأنصح كل واحد منكم يفكر فى المشروع اللى ح يشتغل فيه بعد الاستقالة .

ضابط (٥)

: (يقف)

مدير الأمن

: (متعجبا) ما بتتكلمش ليه ؟ فيه قطة أكلت لسانك !!

ضابط (٥)

: (مترددا) ياسعادة الباشا .. الناس بتقول

مدير الأمن

: (مقاطعا) دلوقت الناس ما بتقولش ، الناس دلوقت بتعمل ، ودى المصيبة اللى إحنا فيها .

ضابط (٥)

: الناس بتقول

مدير الأمن

: (منفعلا) لا إله إلا الله ... ما تتكلم يا ابنى .. الناس بتقول إيه ؟

ضابط (٥)

: الناس بتقول ان البلد ان البلد راكبها عفريت .

(تسود فترة صمت ... ثم ينفجر مدير الأمن ضاحكا ويجاربه بقية الجالسين ثم يصمت فجأة ويصمت الضباط ويسود القاعة صمت)

مدير الأمن

: (يقف ويسير خطوات ويتوقف أمام الخريطة ثم يعود ليجلس) البلد راكبها عفريت معقول الكلام ده !!

الضابط : (متشجعا) كل الناس بتعتقد ده .. وهو مجرد تفسير للى بيحصل فى البلد وأظن أن الناس ح تتمسك بيه لحد ما نلاقى تفسير منطقى .

مدير الأمن : (مفكرا) فليكن ... هو تفسير خرافى ، ولكنه تفسير والسلام (يتجه إلى الجالسين) ولا إيه يا سادة؟؟ (يسمع همهمات الموافقة) وهو شئ يبعد عنكم يبعد عنكم شبح الاستقالة ولو مؤقتا .

ضابط (٥) : (متشجعا) الناس كلها بتتكلم فى الموضوع ده ، لدرجة أنهم مصدقين حكاية العفريت .

مدير الأمن : (يكتب فى ورقة أمامه) أنت مكلف من الآن يا حضرة المأمور (على) و منى شخصيا بالبحث عن العفريت ده .. يا إما تقتله أو وتسجنه أو تطرده من البلد وتطفشه .. المهم ترجع البلد زى ما كانت آمنة ومستقرة

على : (مفزوعا) ولكن يا أفندم ... العفريت...

مدير الأمن : (يقف فيقف الضباط) الاجتماع انتهى يا سادة ، وأريد منك يا على يومى .. ولك كل الصلاحيات (منصرفا) سلام عليكم .

يحيط الضباط بالمأمور (على) وكل واحد يربت على كتفه)

ضابط (١) : (ضاحكا) لولاك يا حضرة المأمور كان زما قاعدين نقشر بصل

ضابط (٢) : والله يا أخى أنت خدمتنا خدمة العمر .

ضابط (٣) : أكيد يا على أنت ح تترقى

ضابط (٤) : (ضاحكا) بس الترقية ح تكون على كف عفريت .

ضابط (١) : والنبي يا على ابعت لى احضر عندك فى القسم وأنت بتحقق مع العفريت .

ضابط (٢) : لو سمحت يا على .. أنا ح أجيب ابنى (سامح) و (أحمد) أصل نفسهم يشوفوا العفريت

(ينصرفون ويبقى وحيدا)

على : (محدثا نفسه) أنا اتعبت .. عفريت إيه وجن إيه ؟ أنا إيه اللى خلانى أقول الكلام ده؟! بس دا الكلام اللى الناس بتقوله .. ومن إمتى إحنا بناخد بكلام الناس ؟ ثم إيه حكاية التقرير اليومى اللى أنا ح أقدمه لسيادته ، وح أكتبه بإيه ؟ بالحبر السرى (يضرب كفا بكف) لا حول ولا قوة إلا بالله ، حتى لو كان فيه عفريت بجد دا ح نعمله فيش وتشبيهه إزاي (يلتقط الورقة البيضاء من أمامه ويخرج قلما) أنا أحسن حاجة أكتب استقالتي علشان أخرج من الورطة دى ، (يتراجع) بس ما أظنش إنه ح يقبلها .. أنا عارفه كويس ح يقول استقالتك مقبولة فى حالة فى واحدة بس بعد ما تسلم العفريت مع العهدة ، أنا غلطان، ليه اتسحبت من لسانى حتى الاستقالة بقت على كف عفريت ،

(فجأة يفتح الباب ويدخل فرج رافعا مقشدة ووراءه إبراهيم .. وفرج يضرب بالمقشدة فى الهواء يمينا ويسارا وفوق وتحت)

إبراهيم : (يتوقف) بطل يا عم فرج عباطة .. دا حضرة المأمور على .

فرج : (ينظر إليه بعمق) ولا ما يكنش العفريت لابس لبس حضرة المأمور

على : (ضاحكا) إيه يا عم فرج .. بدل ما تدخل بفنجان قهوة داخل بالمقشدة .

فرج : (خجلان) لا مؤاخذة يا حضرة المأمور . أصل الناس ...

على : (مقاطعا) عارف يا عم فرج .. بس حقيقى فيه عفريت ؟

إبراهيم : يا حضرة المأمور أنا م الصبح بأحاول أقنعه أن ما فيش عفريت بس عم فرج

على : (مقاطعا) عم فرج معاه حق أنه يظن الظن ده

فرج : (مخاطبا إبراهيم) مش قلت لك .. أهو سعادة المأمور مصدقنى ، معقول البلد كلها تكون غلطانه؟

على : لا طبعا ... بس فيه حد شاف العفريت

- فرج : أيوه فيه ناس شافوه فى أماكن كثيرة
على : شكله إيه يا فرج ؟
فرج : مرة شافوه راكب حصان ، ومرة شافوه راكب حمار ، ومرة شافوه راكب جمل بصنمين ،
وى خر مرة كان راكب عربية مكشوفة
إبراهيم : (ضاحطاً) يعنى مش راكب البلد
على : وكان لايس إيه يا فرج ؟
فرج : مرة يلبس بدلة كاملة ، ومرة يلبس جلابية وفوقها بالطو اسود ، وأحياناً يلبس واحدة ست
عجوزة .
على : وما حدش من الناس بلغ ليه ؟
فرج : ما أنت عارف يا حضرة المأمور العفاريت بتظهر وتختفى على طول وبسرعة .
على : (ضاحكا) أيوه .. أنا عارفها .. وح عارفها أو المفروض أنى أعرفها كويس .

(يسمع طرق على الباب)

- إبراهيم : (يخرج ويدخل) واحد بيقول أنه صحفى اسمه زكريا منسى .
على : خليه يدخل
زكريا : (يفاجئ بوجود المأمور) حضرة المأمور على دى فرصة هائلة .
على : إيه الحكاية يا زكريا ؟ أنت ورايا فى البيت وهنا كمان ؟
زكريا : لا أنا بأروح البيت علشان انا خطيب أخت حضرتك ، وأنا هنا علشان أخبار للجرنال (يخرج بعض الأوراق من حافظته) أنا عرفت أنه كان فيه اجتماع مع القيادات ، بس إيه كان الموضوع ؟
على : وعرفت منين الأخبار دى ؟
زكريا : (يجلس) أسرار المهنة ، قللى حضرتك علشان أكتب
على : سيبك من الكتابة دلوقت ... أنتم ما وصلتنوش إلى تفسير للى بيحصل فى البلد ؟
زكريا : (متعجباً) إحنا مين ؟
على : الصحفيين والمهتمين بالشأن العام
زكريا : أنا قلت لحضرتك أكثر من مرة .. الصحافة تكتب أخبار تسجل وقائع ، أما أسباب الوقائع فأظن مكانها هنا .. المهم أنا عايز خبر عن الاجتماع علشان أنشره فى الصفحة الأولى ، وطبعاً صورتك ح تنور الجرنال
على : (ينهض لينصرف) فوت على بالقسم ، وأنا أدليك أخبار تعمل بيها سبق صحفى
زكريا : أنا ح أمر على البيت على الأقل أتعدى معاكم
على : (يلتفت إليه) أنت مش أتعديت عندنا إمبراح ؟
زكريا : أيوه ، بس النهاردة غدا عمل
على : تعالى ، وبالمره حماتك عايزاك علشان تتكلم معاك على ترتيبات الفرخ
زكريا : لا ، أنا جاى فى غدا عمل للجرنال
على : حماتك هى اللى ح تعمل الغدا ، وهى اللى ح تقترح وتحدد أى الأعمال ح تتناقش على الغدا
زكريا : خلاص ، أنا ح أمر أحسن على القسم .
على : وأنا شايف كدة أحسن .

(سنن)

المشهد الثاني

مكتب المأمور (على) ، يجلس إلى مكتبه واضعا رأسه بين يديه ، يسمع دقا على الباب ، يدخل ضابط ووراءه صول ، وكل منهما في يده بعض الأوراق ، يأذن لهما بالجلوس ، بعد أن يضعوا الأوراق على مكتبه .

- على : (ينحى الأوراق جانبا) شوفوا يا جماعة ، من هنا ورايح أنا عايذكم تتفرغوا لشي واحد بس ، ومعاكم كافة الصلاحيات ، واخذ بالك يا حضرة الضابط (فؤاد) وأنت يا حضرة الصول (مصطفى)
- فؤاد : (متعجبا) إيه هو يا أفندم اللي ح نتفرغوا ؟
- على : (ينهض ويسير بضع خطوات مفكرا ، ثم يلتفت إليهما) أنتم عارفين جماعة الدجالين والسحرة ... بتوع الأعمال والعفاريات والذي منه
- فؤاد : (متعجبا) مالهم يا أفندم ؟
- على : عايزين نقبض عليهم وبأقصى سرعة .
- مصطفى : (مندهشا) هي الأخبار وصلت لسعادتك !!
- فؤاد : (مخاطبا الصول مصطفى) بطل خرافات وكلام فارغ يا حضرة الصول يمكن سعادته قاصده حاجة تانية .
- على : ما عدش كلام فارغ يا فؤاد .. الكلام وصل إلى أعلى المستويات ، وأنا كلفوني شخصيا ببحث الموضوع .
- فؤاد : (متعجبا) يا أفندم إحنا ح نصدق الناس واللى بتقوله !
- على : أيوه يا فؤاد
- فؤاد : اشمعنا المرة دي دائما الناس في جهة ، وإحنا بنكون في الجهة التانية
- على : المرة دي غير كل المرات ، يا فؤاد بأقولك الموضوع وصل إلى أعلى المستويات الأمنية .
- فؤاد : (مفكرا) إحنا عايزين فترة كافية نجمع الأول معلومات عنهم وبالأخص ما فيش شكاوى أو بلاغات على حد منهم .
- على : أنا بأقولك اقبض عليهم بسرعة ، تقوللى عايذ فترة كافية .
- مصطفى : أنا عندي معلومات عن بعضهم
- فؤاد : (مخاطبا المأمور) أنا عايذ سعادتك تنورني .. الجماعة دول ح نقبضعليهم ليه ؟ وعايزين منهم إيه بالضبط ؟ وليه ح نسيب كل شغلنا ونهتم بيهم ؟
- على : (يتلفت حوله) الكلام اللي أنا ح أقوله مش عايذ حد يعرفه بالمرّة
- مصطفى : تمام يا أفندم السر في بيبير ومردوم كمان .
- على : أنتم عارفين إني لسة جاي من اجتماع مع مدير الأمن .
- مصطفى : أيوة عارفين يا أفندم
- على : عارف منين يا حضرة الصول ؟
- مصطفى : حضرتك لسة بتقول أهة
- على : المهم... إحنا وصلنا إلى أمر مهم أن البلد راكبها عفريت .
- مصطفى : (تنتابه حالة هستيرية) سلاما قوللا من رب رحيم ، اللهم لطفنا بنا يا الله ، اللهم اجعل كلامنا خفيف عليهم ، ابعدوا .. ابعدوا
- فؤاد : (متعجبا) فيه إيه يا حضرة الصول ، كأنك أول مرة تسمع الكلام ده أنت مش بقالك

- أسبوع مصدع دماغى بالكلام الفارغ عن الموضوع ده !
- مصطفى : (مرتعشا) أيوه كان الأول كلام ناس مهايبيل ، ويا ما الناس بتقول وكلام الناس لا بياقدم ولا يأخر ، دلوقت الكلام من الباشوات ، على كده الكلام جد ، وجد الجد كمان ، الواحد يقدم على أجازة ويقفل عليه باب بيته طالما العفريت طايح فى البلد
- فؤاد : (ضاحكا ، ومشيرا إلى شنب الصول) والشنب ده يخاف من عفريت
- مصطفى : (يدارى شنبه) وإش يعمل الشنب مع العفريت ، دا عفريت واسألنى أنا على العفاريت
- فؤاد : (مخاطبا المأمور) معقول الكلام ده يا أفندم !؟
- على : واللى بيحصل فى البلد ده معقول .. أنت شايف أن البلد فى حالتها الطبيعية
- فؤاد : لا .
- على : إذن فيه حاجة غير طبيعية ، وغير الطبيعى ما هوش منطقى ، على كده سيب العقل والمنطق .
- فؤاد : (متعجبا) ولكن يا أفندم ... عفريت !!
- على : التفسير اللى يتفق مع اللى بيحصل
- فؤاد : (ضاربا كفا على كف) دى حاجة بتخالف المعقول والمنطق .
- على : (غاضبا) يا فؤاد يا حبيبي .. قلت لك سيب المنطق والعقل .. فيه مانع يمنع إن البلد يكون راكبها عفريت ؟
- فؤاد : (يخرج منديله ويجفف عرقه) أنا مش مصدق اللى بأسمعه .
- على : عندك تفسير للى بيحصل فى البلد ؟
- فؤاد :
- على : إذن ده اللى قدمنا ، واللى ح نعتمد عليه
- فؤاد : (متعجبا) نعتمد على خرافات وخزعيلات !!
- على : ما عدتش خرافات وخزعيلات ... البلد كلها بتتكلم .
- مصطفى : سعادة الباشا معاه حق الناس بتقول أنهم شافوا العفريت .
- فؤاد : (ساخرا) أظن اللى شافوه شافوا عينه مشقوفة بالطول ، وشافوا رجليه رجلين معيز ، وله قرن ، وله ديل .. مش كده يا حضرة الصول .
- مصطفى : إذا كان الناس اللى شافوه بيحلفوا
- فؤاد : أنت شفته بعينك ؟
- فؤاد : هو أنا لو شفته ح أكون واقف قدامك دلوقت
- على : فؤاد ... أنا مش عايز أضيع وقت ومطلوب منك تقدم تقرير يومى .
- فؤاد : (مندهشا) مش معقول يا أفندم ... تقرير يومى عن إيه ؟
- على : (غاضبا) يا فؤاد أنت مش مقدر خطورة الموقف اللى البلد ماشية فيه البلد ماشية فى طريق مظلم .
- فؤاد : والدجالين والسحرة وبتوع الأعمال هم اللى ح ينوروا الطريق المظلم ؟
- مصطفى : دول يقدرنا يعملوا حاجات كتيرة .. أنا ابن خالتى كان مربوط و....
- فؤاد : بطل خرافات يا حضرة الصول .
- على : يا فؤاد الغريق بيتعلق بقشاية .
- فؤاد : يمكن لو بص حواليه يلاقى حبال مش حبل واحد ، وحضرتك عارف ده كويس .
- على : لحد ما يلاقى حبل ، ما فيش غير القشاية دى ، ونصيحة من أخ كبير ... سيبك من أفكارك دى ، أنت ضابط وكل اللى عليك أنك تنفذ الأوامر ... وأفكارك دى هى اللى ما أخرى ترقيتك لحد دلوقت .
- فؤاد : دى مش أفكار دا ضمير
- على : خلينا فى الغريق والقشاية .
- فؤاد : (ساخرا) معك حق يا أفندم ... هى قشاية ولو نفخناها ح تطير
- على : أنا مش عايزك تتطيرها أنا عايزك تجبها دلوقت .
- فؤاد : أوامر حضرتك .
- على : (يتقدم ويضع يده على كتفه) خد كل القوة اللى فى القسم ، وحاول تجيب أكبر عدد ، أنا

- عائز اللى له خبرة ودراية .
- فؤاد : ودى ح أعرفها إزاي ؟
- مصطفى : أنا عارفهم كويس يا حضرة الضابط
- فؤاد : (ملتفتا إليه) واضح إنك ح تخدمنا فى الموضوع ده .
- مصطفى : أصل انا بنت عمتى
- فؤاد : (مقاطعا) أنت ح تحكى لى تاريخ حياتك (يلتفت إلى المأمور) أى أوامر تانية يا أفندم .
- على : التقرير يا فؤاد تقرير يومى ... أتفضلوا أنتم .
- فؤاد : (يتجه نحو الباب ثم يعود) وبعد ما نقبض عليهم إحنا ح نعمل بيهم إيه ؟
- على : (منفعلا) مش ممكن يا فؤاد اللى بتقوله ده فين يا أخى ذكاءك وخبرتك وهمتك .
- فؤاد : (خارجا) إن شاء الله ح أكون عند حسن ظنك .

(س ت ا ر)

مقهى على ناصية من النواصي في حي شعبي ، المقهى قديم ولكن أدخلت عليه بعض التجديدات ، يظهر هذا من المقاعد الجديدة والمفارش وطلاء جدرانه والأضواء ويافطة جديدة مكتوب عليها (مقهى وكافتيريا العفش) ، عدد من الرجال والشباب يلعبون الطاولة والشطرنج ، ويدخنون الشيشة ، وفي ركن يجلس شاب مستغرقا في الكتابة وأمامه كومة من الأوراق ، وصبي المقهى يدخل ويخرج يملاً المكان بصوته النحيف مليبا طلبات الزبائن ، يتوقف حينما يرى رجلا يدخل يرتدى جلبابا بلدى وحذاء (كوتشى) وبرنيطة ، يترنح في سيره ، يقف مفكرا ويتفحص الموجودين ، ثم يعود من حيث أتى ، ثم يرجع ثانيا :

- الصبي : (يمسح المنضدة وينظف جلباب الرجل) أهلا بالمعلم أبوجابر .. نورت الكافتيريا (ينصرف)
 أبو جابر : (يجلس) الولد ليفنى وما سألنيش تشرب إيه .. ولد يا رابسو .. يا رابسو
 رابسو : (يدخل حاملا طلبات الزبائن) أيوه يا معلم .
 أبو جابر : (يشير إليه) بأقولك إيه يا رابسو ؟
 رابسو : (ينحنى إليه) طلباتك يا معلم
 أبو جابر : (يصفعه على قفاه) أنت مش تسألني تشرب إيه يا معلم ، ولا خلاص معلمك اتغنى ، ومهما يتغنى ح يفضل عفش برضه
 رابسو : (ينحس قفاه) إيدك ثقيلة يا معلم ، وأنا عارف طلباتك .. فنجان القهوة المتين وحجر الشيشة المعتبر اللي فيه اللي بالي بالك
 أبو جابر : (يخلع البرنيطة ويضعها على المنضدة ويضع قدما فوق الأخرى) بس برضة لازم تسألني تشرب إيه يا معلم .. مش جايز أكون عايز حاجة تانية من المشاريب اللي بتقدموها اليومين دول ، ما أنتوا من ساعة ما قلبتوا القهوة كافتيريا ودخلتوا الدش المركزى ن وشوية الهلافيت اللي بييسهروا للصبح ما أنتش فاضى للمعلم جابر ن خلاص بقينا مودة قديمة ... إخص عليك يا زمن .
 رابسو : إزاي يا معلم ، دا أنت من المؤسسين من ساعة ما كانت القهوة كشك على الرصيف .
 أبو جابر : أحسن حاجة فيك يا رابسونك ما بتتساش أصلك ، أنت أحسن من معلمك اللي نسي أصله وغير شكل القهوة عملة كافتيريا .
 رابسو : يا معلم كان الأول ما بيقعدش على القهوة إلا المعلمين وولاد البلد دلوقت بعد المجلة ما فتحت جنبنا بيقعد الصحفيين والموظفين وشباب الجامعة ... دا المعلم ناوى يعمل ركن للسيدات .
 أبو جابر : أنت ح تقوللى ، ما الواد الأستاذ جابر قاعد هنا طول اليوم ، بييسر مع أصحابه الهلافيت للصبح
 رابسو : ربنا يخليهك يا معلم ... دا هو وأصحابه منورين ركن الشباب .
 أبو جابر : (ينظر حيث يشير رابسو) أمال أنا مش شايف حد منهم ليه .
 رابسو : لسه بدرى يا معلم ... ما السهرة بتكون صباحى .
 أبو جابر : ما أنا عارف .. العجول اللي عندى بعد كل واحد ما خلص تعليمه وصرفت عليه دم قلبى بيناموا طول النهار ويسهروا طول الليل ، ولا واحد عايز يقف معايا فى المحل ... إزاي يقف فى مطعم السمك !! واللى منشف دماغ ولاد الكلب دول أمهم (يقلدها) إزاي يا معلم بعد ما حصلوا العالية يقفوا وسط السمك والزفارة .. ما أنا طول النها طافح الدردي علشانهم ... ما أنا الحمار .. ما أنا خدام أهلهم .. ما أنا
 رابسو : (مقاطعا) ما أنا وقفت كتير يا معلم والزباين بتنادى عليا ... طبعا فنجان القهوة السادة والحجر المعسل (يقترب منه) وفين حته الحشيش
 أبو جابر : (يخرج لفافة صغيرة ويضعها فى يد رابسو) أنت عارف يا واد يا رابسو بعد ما أشرب الكاسين فى خمارة مرقص لابد من فنجان القهوة من إيدك والحجر علشان دماغى يتعدل بقية الليلة (ينصرف رابسو) ما أهم حاجة فى الدنيا الخبراتة دى الدماغ الرايق ... ولد يارابسو أنت رحت فين (ينظر بجواره) دا الأستاذ حناطة قاعد جنبى وأنا مش واخد بالى اتفضل يا أستاذ اشرب فنجان قهوة معايا .. ولا أنت لسة زعلان منى .

- حناطة : (يطوى الصحيفة ويجلس بجوار المعلم) طبعاً زعلان منك ، بعد اللي قلته فى المصلحة
أبو جابر : ما أنت كمان مزود الضرايب حبتين يا أستاذ حناطة
حناطة : مش أنا والله .. دا قاتون الضرايب الجديد ، ما أنت عارف .. أنا لو عليا .
... دا أنت حبيبي يا معلم .
- أبو جابر : على كل .. ماترعلش من الكلمتين اللي قلتهم فى المصلحة .
حناطة : بس أنت زعلت المدير بتاعنا قوى وقلت كلام ما يصحش .
أبو جابر : ما أنا فاض بيا يا أستاذ .. أنا راسى دى مش راس كرنبه .. أنا دماغى متكلفة ، وأنا فى
السوق طول عمرى وبأفهم ، فيه ناس معاهم ملايين .. وبيعملوا دفاتر مخصوصة لبتوع
الضرايب ، وكما بيسوا أمورهم من تحت التربييزة ، تيجوا أنتم على مطعم السمك الكحيان
بتاعى وتحسبوا ضرايب بالألاف !!
- حناطة : (يقترب منه) طالما التربييزة موجودة ما تسوى حالك أنت كمان .
أبو جابر : دول بيسوا أمورهم وبيدفعوا لأن معاهم ملايين ، أنا يا حسرة اللي جاى على قد اللي رايح .
حناطة : (ضاحكا) الجواز الجديدة كلفتك كتير يا معلم .
أبو جابر : (ضاحكا) أنتم بس لو تبعدوا عنى ح أتجوز كل شهر .
حناطة : إنما قللى يا معلم إزاي كل تفكيرك فى الجواز والبلد زى ما بيقولوا راكبها عفريت ؟
أبو جابر : (يأخذ فنجان القهوة من يد رابسو والشيشية) شوف يا أستاذ ، أهل زمان قالوا ما عفريت
إلا بنى آدم ، أنت عمرك شفت عفريت سرق نهب اختلس قتل زور فى الدفاتر علشان يضحك
على مصلحة الضرايب شرب خمرة ولا حشيش ولا أستورد أكل فاسد ولا أستورد مبيدات
تسبب والعياذ بالله السرطان ، فى الجرنال عندك وفى صفحة الحوادث مين اللي بيعمل
الجرايم كلها ؟
- حناطة : (ضاحكا) أنا عمرى ما شفت عفريت ، علشان كده أنا ما أعرفش إن كانت العفريت بتعمل
كده ولا لأ .
- أبو جابر : (يدخن) شوف يا أستاذ .. أنا بأقولك اللي عفرت العفريت هو بى آدم ، بنى آدم ده جبار
ما يقدرش عليه غير ربنا .. أنا مثلا ... بالك لو إيدى طايله أتجوز كل شهر وأطلق الشهر
اللى بعده ، واستورد خمر من فرنسا ، وأحسن أنواع الحشيش والأفيون ، وأعيش سلطان
زمانى وأدوس على رقاب الكل .. شوف يا أسناذ الصراحة راحة على رأى البنيت اللونة
بتاعة الفيلم ... وهو ده اللي بيحصل ناس طايله ودايسه على رقاب الناس زى أمريكا دايسه
على رقاب الخلق يا ولداه ن وزى إسرائيل ماهى طايحة فى الفلسطينيين .
- (يدخل زكريا الصحفى ، يسلم على المعلم وحناطة)
- زكريا : (ضاحكا) إيه يا معلم... أنت سببت البلطى والبورى والمياس وبتتكلم فى السياسة ولا إيه؟
أبو جابر : شوف يا أستاذ زكريا ، انا علامى على أدى ، بس بأفهم من أحسن وزير فى بر مصر ، ما
تستغربش يا أستاذ ، بالك اللي ودا البلد فى داهية
زكريا : (مقاطعا) هى البلد راحت خلاص يا معلم .
أبو جابر : خلاص إحنا فى الباي باى ، هو أنت فاكِر إننا إحنا إحنا ... لا إحنا رحنا من زمان .. ضعنا
، تهنا ، الموجودين دلوقت مش إحنا .. دول ناس تانية .
- حناطة : (ينظر فى حجر المعسل) الظاهر الصنف اللي أنت جايبه النهاردة جامد قوى يا معلم .
أبو جابر : (يرمى الميسم من يده) لا جامد ولا نيئة ، دا صنف مغشوش زى كل حاجة مغشوشة فى
البلد .
- زكريا : هو يعنى السمك اللي أنت بتبيعه ما هوش مغشوش .
أبو جابر : سمك إيه يا أستاذ ... دا البنى آدميين أصبحوا مغشوشين ، مش لسة بأقولك إحنا مش
إحنا .. (ساخرا) قال والأستاذ حناطة بيقولك البلد راكبها عفريت ، قول البلد راكبها بنى
آدميين .
- زكريا : بس كل الناس بيقولوا حكاية العفريت .
حناطة : وفيه ناس بيقولوا أنهم شافوه

- أبو جابر : دول ناس مجانيين .
- حناطة : أمال يا معلم إيه اللي مشقلب حال البلد كده ؟
- أبو جابر : البنى آدميين ... البنى آدم دا جبار ما يقدرش عليه غير ربنا .
- زكريا : أنتم عارفين مين اللي يفهم فى حكاية العفاريت والكلام ده ؟
- حناطة : مين ؟
- زكريا : (يشير) انتم شايقين الأستاذ اللي قاعد هناك ده .
- أبو جابر : أيوه الأستاذ اللي ما بيبتلش كتابة ولا قراية وما بيكلمش حد .
- زكريا : دا صحفى زميلنا بيعمل فى مجلة (الشعاع) .
- حناطة : المجلة اللي فتحت جنبنا هنا ؟
- زكريا : أيوه
- أبو جابر : أمال لا بنشوف صورته فى الجرنال ولا بنقرا عنه فى المجلة .
- زكريا : كل مقالاته يتنشر برة .
- حناطة : وليه ما بينشرهاش هنا .
- زكريا : لا دى حكاية طويلة .
- حناطة : وإيه علاقة العفاريت بالأستاذ .. اسمه إيه .
- زكريا : الأستاذ عباس بلطية .
- أبو جابر : (ضاحكا) دا أكيد انا أعرفه كويس ن بس دا صادوه من أنه بحر .
- زكريا : الأستاذ عباس متخصص فى الكتابة عن العفاريت والجن والسحرة والحاجات دى .
- أبو جابر : نادى عليه يشرب فنجان قهوة معنا ، وبالمرة نتعرف على العفريت أقصد نتعرف عليه .
- زكريا : (واقفا ومشيرا للأستاذ عباس) ياأستاذ عباس تعالى اشرب فنجان قهوة ز
- عباس : (ينهض ويجمع أوراقه) إنتم لو ما كنتوش ندهتولى ، أنا كنت ح أجى .
- أبو جابر : أهلا بالأستاذ بلطية ، دا أنت ح تنور القاعدة ... ولد يا رابسو فنجان قهوة للأستاذ .
- عباس : أنا كنت سامع كلامكم .. والمعلم أبو جابر معاه حق مافيش عفريت .
- زكريا : (مندهشا) دا أنت كل شغلك على العفاريت والجن والكلام ده ، دا فى الوسط الصحفى
- عباس : سموك عباس الجن ، وبيعتبروك مرجع فى الأمور دية
- عباس : أنت لو قرأت آخر كتبى كنت ح تعرف أن العفاريت والجن والشياطين موجودة فى إمخاخ الناس وفى تصرفاتهم وفى أفعالهم .
- أبو جابر : أنا مش فاهم حاجة ياأستاذ بلطية .
- عباس : زى ما كنت بتقول يا معلم من شوية .. ما عفريت إلا بن آدم .. واللى عفرت العفريت هوبنى آدم ، وأنا كتبت الكلام ده .
- أبو جابر : (واقفا) أنا مش قلتك ياأستاذ زكريا .. أهو الكلام اللي بأقوله بتكتبه الصحافة .. دا دماغى متكلف .. ولد يا رابسو (يخرج لفافة من جيبه) على كده الصنف مش مغشوش ..
- حناطة : خد يا ولد يا رابسو اعملى تعميرة وهات قهوة للأستاذ بلطية .
- عباس : أنت قصدك تقول اللي مشقلب حال البلد هم الناس .
- زكريا : بالضبط يا حضرة
- زكريا : إذا كان الناس هم اللي حالهم متلخبط ، والناس هم اللي بيقلوا الكلام ده وشافوا العفريت وشافوا عمايله وأفعاله ... ثم إن كل كتاباتك ومقالاتك فى المجلة وأحاديثك فى القنوات الفضائية الخارجية بتقول فيهان الحاجات دى موجودة .
- عباس : الموجود شئ وتأثير هذا الموجود فيمن حوله شئ تانى .
- أبو جابر : (يهز رأسه) أنا مش فاهم حاجة ياأستاذ بلطية .
- عباس : أنت مثلا يا معلم موجود دلوقت فى قهوة العفش ... صح .
- أبو جابر : أيوه صح .
- عباس : هل أنت فى اللحظة دى لك أى تأثير على الموجودين فى القهوة ؟
- أبو جابر : لا... كل واحد قاعد على كيفه ، اللي بيلعب طاولة واللى بيشرى شيشة .
- عباس : وعلشان ما لكش أى تأثير ، فأنت مش موجود وما لكش أى لزمة .
- أبو جابر : (يقف غاضبا ويمسك فى خناق عباس) ألا .. ألا ما تحسن ملافظك يا أستاذ .. يعنى إيه

ما ليش أى لزمة ؟

زكريا : (يخلص عباس من يد المعلم) يا معلم الأستاذ عباس بي طرح فرض فكرى ، ما يقصدكش أنت بالتحديد .

أبو جابر : (معتذرا) ما تاخذنيش يا أستاذ بلطية أصلى أنا علامى على قدى ، وأنا قاعد وسط أساتذة الصحافة وأنت كنت مش فاهم حاجة برضه .

حناطة : يا معلم .. الأستاذ عباس بيقول أن طالما العفريت ما لهاش تأثير فى حياة الناس فهى مش موجودة ، أو كأنها مش موجودة فى حياتنا .

أبو جابر : (ينهض ويقبل رأس عباس) ما تزعلش منى ، والله كلامك معقول ، هو إناح نرجع لألف ليلة وليلة والفاريت والجن والشياطين والخاتم اللى جوه بطن السمكة .

زكريا : اللى أنت بتقوله يا أستاذ عباس مجرد فرض فكرى ، وممكن اللى بتقوله الناس صح ، ولا إيه سبب الحالة اللى فيها البلد ؟

عباس : الكتب اللى أنا كتبتها مش من فراغ ، ما فيش دجال فى البلد إلا ورحت له وقعدت معاه وناقشته ، واتكلمت مع الناس اللى بيعتقدوا فى الكلام ده .. الناس كائن هلامى من السهل التأثير فيه والسيطرة عليه ، لأنه بيهرب من الحقيقة ، مش عاوز يواجه نفسه ، عاوز يبرأ نفسه ويعلق كل أخطائه على كائن خرافى اسمه عفريت .

(يمر مجموعة من الصبية يصيحون : العفريت ظهر ، العفريت ماشى فى الشارع . تغلق النوافذ والأبواب ، النساء يخرجن ليأخذن أولادهن وأزواجهن من الطرقات ، المحلات بجوار المقهى تغلق أبوابها ، وفجأة يحدث انفجار صادر من داخل القهوة ، يسود الظلام ويتطاير شرر نار هنا وهناك ، ويحدث هرج وتعالى الصيحات وسط الظلام الدامس ، ويسمع صوت تكسير مقاعد وتحطيم زجاج ومصابيح وصراخ وصيحات ألم)

- صوت (١) : أنا مسكته ... أى .. ضربنى فى دماغى .. دم ... دم
صوت (٢) : مسكت رجليه ... أه يا عيني .. عيني طارت
صوت (٣) : أهوه .. أهوه ... أه ... ضربنى فى بطنى
صوت (٤) : أوعا ياجدع أنا شامم ريحته ... ريحته زفره
صوت (٥) : يا ابن الكلب ... سبنى ... سبنى ... أنت واخذنى على فين

(يسود الهدوء تدريجا ، ويوتى بشمع ومصابيح من المحلات المجاورة يضاء المكان ، كل شئ محطم المقاعد والبشر ، البعض مدرجا فى دمانه والآخر مغمى عليه ، والبعض ممزق الملابس)

أبو جابر : (فى الناحية المقابلة) إيه اللى جابنى هنا ، أنا كنت قاعد هناك !
حناطة : (جالسا على الأرض ممزق الملابس متورم العينين) أه يا بطنى ، آه يا عيني دا أنا أكلت ضرب بعمرى كله

أبو جابر : (يسوى من ملابسه الممزقة) حصلك حاجة يا أستاذ زكريا .
زكريا : (ينهض من على الأرض وينفض ملابسه) أنا أول ما سمعت الطرقة اترميت على الأرض وخبيت دماغى .

أبو جابر : الله ... الله ... الأستاذ بلطية فين .. كان قاعد هنا
حناطة : ما فيش غير إن العفريت خطفه .

أبو جابر : اشمعنا .. وليه ما خطفكش أنت ؟
حناطة : هو اللى كان بيتكلم على العفريت ، يمكن كلامه ما عجبش العفريت .

زكريا : كده العفريت موجود فعلا وله تأثير .
حناطة : وإلا فين الأستاذ بلطية ؟

زكريا : (ملتقطا بعض الأوراق من تحت المقعد) مش دى الأوراق اللى عباس كان بيكتب فيها ؟
حناطة : أيوه .. وليه العفريت ما أخدهاش ؟

أبو جابر : يمكن العفريت ما بيعرفش يقرا
حناطة : (خانفا) كفاية لحد كده .. أنا مروح ، وربنا يستر علينا لحد ما نوصل البيت .

<p>(ممسكا رأسه) الله يخرب بيت دا عفريت ، ضيع الحجرين والكاسين (يمسك بيد المعلم أبو جابر) اللهم اجعل كلامنا خفيف عليه ، كفايه كده يا معلم ، اسكت علشان نروح سالمين . وبلطية مش ح نبلغ أنه اختفى من وسطنا ح نقول إيه خطفه عفريت سيب نقابة الصحفيين تتولى الأمر وتعرف شغلها مع العفريت . (يمسك الأوراق والنظارة) حاجة غريبة الأوراق والنضارة !! مش ممكن يكون مشى ، أنا عارفه ما يقدرش يستغنى عن نضارته هو ح يعمل إيه بالنضارة وهو مع العفريت ؟ بس دى أول حادثة خطف يقوم بها العفريت ويخطف مين ؟ عباس بلطية أكبر باحث فى العفاريت والشياطين !! (يجذب المعلم أبو جابر) الحمد لله أنه ما أخذناش معاه .. يالا يا معلم ننفذ بجلدنا .</p>	<p>أبو جابر حناطة أبو جابر حناطة زكريا حناطة زكريا حناطة</p>
---	---

(ستارة)

الفصل الثاني

حجرة الحجز فى القسم ، جزء من المسرح مضى إضاءة خافتة والجزء الباقى مظلم ، أغلب المحتجزين فى الجزء المظلم ، بصيص من نور خافت ينفذ من شباك حديدى مرتفع ، يتقدم إلى وسط المسرح شيخ ضخم الجسم ، يستند على زراع شاب فارغ الطول ، معصب الجبين .

- الشيخ : (يحرك عصاه يمينا ويسارا وإلى أعلى وإلى أسفل) ولد يا فصوليا ، إحنا فين دلوقت ؟
 فاصوليا : (يتحسس ظهره ورأسه) آه .. والله ما أنا عارف يا شيخ هدهد .. الدنيا ضلمة بعد ما قفلوا الباب ورمونا هنا .. أكيد دى أوضة الحجز .
- هدهد : (يتحسس قفا فاصوليا) إنما يا ولد يا فصوليا لما جم الجبابرة يقبضوا علينا .. أنا كنت سامع حاجة بترقع وترن .. ألا دا كان إبيه يا فاصوليا ؟
 فاصوليا : (يبعد يده عن قفاه) أيوه ... يا شيخ ... ما أنت طلعت مكار ، كورت نفسك زى القنفذ وعملت إنك مغمى عليك ، وما كانش ظاهر منك حاجة تنضرب فيها .
- هدهد : (يخلع النظارة وينفخ فيها ويمسحها فى صدره جلاببه ثم يضعها على عينيه) أنا سمعتك وبينى وبينك باب مقفول ، وأنت عملت الشويتين بتوعك ، أنا حاولت أنى أنبهك ، وأقولك ما طلعت النبوت بس ما لحقتش ... كانوا زى الكلاب الجعانة اللى لقت حتة لحمه طرية (يتحسس جسد فاصوليا)
 فاصوليا : (يبعد يده) وأنت إش عرفك إنهم مخبرين ؟
 هدهد : يا ولد أنا بأشم ريحة المخبرين قبل ما يوصلوا بيوم .
- فاصوليا : (معاتباً) طاب اعمل حاجة .. قول حاجة .. خلصنى من أيديهم .
 هدهد : (ضاحكا) أنا لما سمعتك بتشتتهم ، وبدأت تطيح فيه بالنبوت زى عادتك المنيلة ... أنا قلت الولد فاصوليا راح خلاص . إتاكل مش ح يبقى منه غير هدومه .
- فاصوليا : (بأسف) أول مرة أعرف إنك بتتخلى عن صبيك ودراعتك اليمين بالطريقة دى .
 هدهد : (يربت على كتفه) يا ولد أنا عمرى ما أتخلى عنك ، أنا بأحبك ، بس يا حبيبي اللى من نصيبك لأبد يصيبك .. وأهه أنت أخذت شلوطين على قلمين على قلمين على لكيتين على تفتين ، وأنا برضة نابنى من الحب جانب .
- فاصوليا : (متعجبا) أنا ما شفتش عملوك حاجة !
 هدهد : يا بنى أنت لا كنت سامع ولا شايف ولا حاسس بحاجه خالص .. أنا كنت سامع وأنا فى الخلوة بتاعتي ، كأن فيه ماتش كورة بيتلعب ، والكورة دى هو أنت .
- فاصوليا : يعنى سمعت كل الكلام اللى أنا قلته .
 هدهد : (ضاحكا) أنت ما كنتش بتقول غر كلمتين .. ح أموووت .. يا ولاد الكلب . ولما أنت كتمت النفس خالص ، أنا قلت دول خلصوا على الولد فاصوليا بعد كده دخلوا عليا .. أنا كنت جثة هامدة زى ما بيقولوا ، جثة هامدة من اللى سمعته بيعملوه فيك ، بس واحد منهم .. الله ينتقم منه ضربنى شلوط لبس فى فى العصوص (يتحسس أسفل ظهره) رعشنى يا ولد يا فصوليا ، وأنا ح أعرفه فى يوم من الأيام وح أرد له الشالوط .
- فاصوليا : وأنت ح تعرفه إزاي ، وأنت ما شفتهوش .
 هدهد : من صوت جزمته ، عمرى ما ح أنسى صوت الجزمة يا ولد .. جزمة قديمة قديمة وطويلة وبرقية ومدقوق فيها حديد من تحت .
- فاصوليا : قصدك مسامير .
 هدهد : لا يا ولد .. حديد .. والجزمة لونها بنى .
- فاصوليا : (متعجبا) طاب الصوت وقلنا أنك سمعته .. أما اللون شفته إزاي وأنت أعمى ولا بس نضارة سودا ، والدنيا كانت ضلمة كحل .
 هدهد : يا حمار أنت ما بتشفش فى الضلمة لأنك مفتاح ، محتاج الدنيا تكون نور علشان تشوف ... أنا محتاج النور ليه ؟
- فاصوليا : قصدك أنك بتشفش فى الضلمة .
 هدهد : عليك اتنين كيلو كهربا .. يا ولد إحنا بنشوف فى الضلمة لأننا ما لناش عيون ، عايز

- تشوف فى الضلمة يا فاصوليا .
 (يتفرس فيمن حوله) يا ريت .
 غمض عينك .
 (يضع يده على عينيه) غمضت بس مش شايف حاجة .
 (يضربه على قفاه) لنك حمار .. ضلمة ومغمض عينك وعابز تشوف كمان .. ولد .. أنا شايف مكان هناك فاضى على يمين الشباك ، تعالى نقعد
 أنا مش شايف حاجة خالص .
 أصلك أعمى .. تعالى .. هات إيدك .. خطى يا ولد .. خلى بالك البلاطة اللي تحت رجلك مكسورة .
 (يجلس) معاك حق .. فيه شباك فقتنا أهوه .
 (يتشمم الجو حوله ويضع العصا تحت فخذة) ولد يا فصوليا فيه نسوان معانا فى الحجز .
 (متعجبا) إزاي يكون فيه نسوان معانا ، وإحنا رجاله .
 (يقف منتفضا) أنا بأقولك فيه نسوان معانا فى الحجز ، فيه واحده تخينه قوى ... وواحده رفيعة ومعها شابة صغيرة .
 (يقف ويتفرس فى الظلام) معقولة اللي أنت بتقوله ده يا شيخ !!
 (يدفعه) قم يا ولد وشوف هما قاعدين على يمين الباب .
 (يتقدم مادا يده فى الظلام) مساء الخير يا جماعة .
- (يسمع صوت صفعات متتالية) .. أى ... أى ...
- (متأثرا) الولد فاصوليا اتبهدل فى البلد دى ... لا حول ولا قوة إلا بالله .
 (يتحسس خديه) أيوه فيه نسوان .
 (ضاحكا) أيوه ... ما أنا سمعت .
 بس إيدهم ثقيلة قوى .
 أنا قلت قوم وشوف ... ما قتلتكش حسس يا فاصوليا .
 أنا لقيت حاجة طرية وناعمة فمسكتها . وفجأة لقيت وشى ولع من الضرب .
 شوف يا فاصوليا ... طول ما إحنا هنا إبعد عن الحاجات الطرية والناعمة وأنت تسلم يا بنى .
 زى ما قلت يا شيخ ... واحده تخينه وست رفيعة ومعها شابة صغيرة .
 (يجلس) اجلس يا فاصوليا .. بس أنا حاسس إنك مش مبسوط حبتين .
 (باكيا) من اللي أنا فيه ... هو اللي أنا فيه شوية .
 (يربت على كتفه) معاك حق يا فاصوليا ، أنت اتبهدلت فعلا ، ولسة ح تتبهدل ... إنما إزاي يحبسوا نسوان معانا .
 وحتى ده مش قانونى .
 والله الدبلوم اللي أنت أخذته بخمسين فى المية نورك برضه .. ياولد هو فعلا القانون يمنع أنك تحجز النسوان والرجاة فى حجرة واحدة بس القانون عندنا زى الجزمة .
 (مستفهما) إزاي يعنى ؟
 الجزمة بتتفصل والقانون بيتفصل ، والجزمة بتنداس والقانون بينداس ، الجزمة ممكن نوسعها وتضيقها على كيفك ، والقانون برضة كده ، وممكن تحط تحته حديد وتضرب به مؤخرات الناس زى ما حصل معايا
 (متضايقا) يا عم إنس بأه
 (يتحسس رأسه) مالك يا ولد قرفان ليه
 جعان وعطشان وتعبان
 عابز تاكل
 إنشا الله لقمة عيش حاف وبق ميه
 (يسند ظهره إلى الحائط) إيه رأيك فى أكلة كباب وكفتة ، وزجاجة خمر معتقة وسيجارة

- معمره ياولد بالحشيش .
- فاصوليا : الظاهر الشالوط ما جاش فى العصعوص ، دا جه فى مخك يا شيخ
- هدهد : (يمسك يده) تدفع كام لو أكلتك دلوقت وشربتك .
- فاصوليا : أكون خدامك طول عمرى ... دى ح تكون كرامة منك
- هدهد : (يضربه على قفاه) كرامة إيه يا حمار .. بقولك خمرة وحشيش
- فاصوليا : (متضرعا) اللي توامر بيه .. أنا أنفذه .. بس لقمة عيش ولو حاف .
- هدهد : (يفتح جلبابه ويخرج لفانف ويضعها بجانبه) مد إيدك يا فاصوليا
- فاصوليا : (يفتح اللفانف مندھشا) إيه ده .. كباب .. وكفتة ... وسلطة طحينة .. الله أكبر... الله أكبر
- هدهد : ... صلى على النبي يا جدع
- فاصوليا : (يجذبه من قدمه) اتفضحنا .. سلطة الطحينة لحست مخ فاصوليا
- فاصوليا : (يدور حول نفسه) قوموا يا خلق .. شوفوا هدهد جاب إيه .. جاب إيه هدهد أبو الهداهيد
- هدهد : صحيت الجيران يا فالج ... اقعوا يا جماعة واقفين ليه ، اتفضلوا لقمة على قد ما قسم
- فاصوليا : (يأكل) معقولة دى .. الكباب سخن والكفتة كمان .
- هدهد : (ينصت) أنا حاسس إنى أعرف الأخوة اللي معنا هنا
- صوت (١) : (يأكل) طبعا يا شيخ هدهد ، أنت تعرفنى كويس .
- هدهد : قرب كده يا أخ
- صوت (١) : ... هه عرفتنى
- هدهد : (يضع يده على أنفه) عرفتك من ريحتك ... أنت فتوح النتن .
- صوت (٢) : وأنا يا شيخ هدهد
- هدهد : (مفكرا) صوتك بي فكرنى بالمصيبة اللي أنا فيها دلوقت .. أنت حسن أبو الدواهى .. أمال أخوك أبو عجور فين يا حسن ؟
- حسن : قاعد جنبى .. بس مش عارف يتكلم .. بقه مليون أكل .
- هدهد : (ضاحكا) ما هو طفس زى أبوه ... هم الستات مكسوفين ليه .. ما تاكلوا يا جماعة . الله أعلم إناح نخرج من هنا إمتى ؟
- فاصوليا : (يأكل) أظنك ما تعرفش الستات اللي هنا يا شيخ .
- هدهد : (يتحسس رأسه) شوف يا فاصوليا ... فتوح النتن وحسن أبو الدواهى وأخوه أبو عجور .. أتجمعوا هنا .. أكيد الستات دول أنا أعرفهم
- السيدة التخينة : (تأكل) عمره ما ح يعرفنى .. أصله نسانى .
- هدهد : (ضاحكا ومادا يده) معقوله دى .. الست زيطه العايقة ، مين يتصور أننا نتقابل هنا يا سلام يا ولاد (يقترب منها) لسة برضه بطلقى الستات من الرجالة علشان يدوروا على حل شعرهم يا ست زيطه يا عايقة .
- زيطة : (بدلال وتضرب على يده) ما تكشفش ستري يا شيخ هدهد .
- هدهد : (يتحسس يدها ويحصى الأساور حو معصمها) بس إنت اتغنيت قوى يا عايقة ، وحسابك فى البنك كتر .
- زيطة : (بدلال) وأنت تعرف حسابى فى البنك منين ؟
- هدهد : (ضاحكا) أصل نسبة الطلاق زادت قوى فى البلد .. المهم .. مين الست اللي معاك
- زيطة : (تشير إليها) دى الحاجة هديات ... ومعها بنتها بسيمة . ما سمعتش عنها ولا إيه ؟
- هدهد : سمعت ... سمعتها زى الطبل .. ووصل صيتها لدول الخليج .. مش دى اللي بتعمل خلطة جهنمية تخلى الرجل العجوز زى الطور المطلق ووقفت حال الفياجرا ، وبتعمل خلطة تانية تخلى العجوزة صبية ... يا أهلا يا ست رزيات .. أقصد هديات ... وبنت الحلوة الجميلة (بسيمة) على ذمة كام رجل دلوقت ؟
- هدديات : (تمسح دموعها) خلاص يا شيخ هدهد . أنا تبنت خلاص ، تبعت يا خويا والبنت تبعت معايا .
- هدهد : (ضاحكا) يا ست .. دى شدة وح تروح لحالها ، وح ترجع ريما لعاداتها القديمة .. المهم أنتم نورتوا الحجز .

- فاصوليا : (يمسح يده وفمه) إحنا خلصنا الأكل وأنت ما أكلتش .
 هذه : بالهنا والشفا يا جماعة (يبحث حوله) ولد يا فاصوليا ، أنت أخذت إزازة الخمرة اللي كانت هنا ؟
- فاصوليا : (يقدمها له) أهه .. بس ما فيش كبايات نشرب فيها .
 هدهد : (ساخرا) ناقص تقल्ली عايز تلج
 فاصوليا : يا ريت تكون معاك حطة تلجة
 هدهد : (ضاحكا) لا دا أنت ح تسطنطع فيها وتقول عايز مزة كمان ، كل واحد ياخذ بق من الإزازة وخلص (يخرج من جيبه عددا من السجائر) أنا ما معيش إلا تلت سجائر محشية .. خد يا نتن .. وأنت يا أبو الدواهي .. وأنت يا أبو عجور .. فاصوليا ما لهوش فى الصنف ولا الستات طبعا ... ولا تخمسي معانا يا زيطة
- زيطة : لا بطلت يا شيخ هدهد
 فتوح النتن : (متعجبا) وأنت مش ح تشرب معانا سجائر
 هدهد : (ضاحكا) لا أنا بأشربها على الريحه يا خايب .
 أبو عجور : (يدخن) طول عمرنا بنقول عنك أنك بروفيسور
 حسن أبو الدوهي : كلنا اتعلمنا منه وخرجنا من تحت إيده
 زيطة : البلد كلها ما فيهاش أخوه
 فتوح النتن : (يدخن ويضحك بهستيريا) داأنت جبار يا شيخ هدهد ، والله اتعلمنا منك كثير ، بس ما حدش قدر يوصل للى أنت وصلته .
- هدهد : (ساخرا) يا ريت اتعلمتوا منى حاجة كويسة ... بس إنتوا كنتوا ح تنفعوا فى إيه .. اللي منكم كان حرامى غسيل .. واللى حرامى حلل وفراخ .. واللى منكم كان بيسرق الحمير ... أهه علمتكم شغلانه والسلام إنما أنتم خونة وولاد كلب ومجرمين .
 : ليه كده .. ليه كده .. إحنا لسة واكلين عيش وملح .
- حسن : كباب وكفتة يا طفس يا ابن الطفس .
 هدهد : طاب ليه إحنا خونة ؟
 فتوح : كل واحد كان بيشتغل من الباطن ، كنتم تخذوا الزباين منى .. بس لاتكم أغبياء وحمير .
 هدهد : كانت الزباين بترجع تانى عندى ، وتقوللى على كل حاجة .
- فتوح : (مستفسرا) إنما هم قبضوا علينا ليه ؟
 حسن : علشان شغلنا كله غلط فى غلط .
 هدهد : وإيه فى البلد ما شى صح يا أبو الدواهي .. ما البلد ماشية بالمقلوب
- حسن : مش البلد بس ... دى الدنيا كلها
 فاصوليا : (مترنحا) بس مين اللي قلب البلد
 هدهد : الناس طبعا يا فالج .
 فاصوليا : (يعانى من زغطة) طاب ما الناس يعدلوا البلد .
 هدهد : مش لما يتعدلوا هم الأول ز
- فاصوليا : (يمص زجاجة الخمر) وأنا مرمى تحت رجلين المخبرين سمعت واحد بيقول أن البلد راكبها عفريت .
 هدهد : ولد يا فاصوليا .. أنت كنت بامية مهروسة تحت رجلين الجبابرة معقول كان لسه فيك وذن بتسمع .
- حسن : أنا سمعت الكلام ده فعلا .
 زيطة : ما الكلام مالى البلد .. والناس ما لهاش سيرة إلا الحكاية دى .
 هدهد : (غاضبا) وأنا آخر من يعلم ... إزاي ما حدش يقوللى
 حسن : المفروض أنت اللي تقول للناس
 هدهد : ليه يا روح أمك ، هو أنا مخاوى عفاريت .
- حسن : إيه يا شيخ هدهد ...، الكباب والكفتة كانوا نازلين من فوق الفحم وسلطة الطحينة ، والخمرة والسجائر المعمرة بالحشيش .. دول جم منين ؟ وأنت عارف أنهم بيفتشونا وياخدوا كل حاجة معانا قبل ما ندخل ... وما فيش زيارة دخلت لنا .

- هدهد : (مفكرا) آه .. تقصد أن عفريت جاب لى الحاجات دى ، على كده هم جمعونا هنا بربطة المعلم علشان
- حسن : يا إما عندهم شك إننا إحنا اللى سلطنا العفريت على البلد .. أو عايزين منا نخلص البلد من العفريت .
- هدهد : (ينهض) ولد يا فاصوليا .. دور بى حول الحجرة دى يا ولد .
- فاصوليا : (يأخذ بيده) ليه يا شيخ ؟
- هدهد : علشان عايز أفكر .
- فاصوليا : (متعجبا) هو أنت ما تعرفش تفكر إلا وأنت بدور ؟
- هدهد : أصلى بنشفهم يعملوا كده فى مسلسلات التليفزيون .
- فاصوليا : (يدور به) بس إحنا ما عندناش تليفزيون
- هدهد : أنت حمار يا ولد ... وهو أنا بأشوف علشان أتفرج على التليفزيون
- فاصوليا : آمال شفت المسلسلات فين ؟
- هدهد : يا بنى سمعت الناس بتقول كده
- فاصوليا : (متوقفا) كفاية كده ولا نلف كمان لفة .
- هدهد : يا فاصوليا التعلب بيلف سبع لفات إيش حال أنت حمار .. لف لفة كمان .
- فاصوليا : (مترنحا) أنا حاسس أن دماغى بيلف وح أقع
- هدهد : أنت بتلف بدماغك ولا بيا يا ولد
- فاصوليا : كفاية كده أحسن رجلى .
- هدهد : (متوقفا أمام رجل) الأخ ده معانا من إمتى
- فاصوليا : من أول ما دخلنا .
- هدهد : (يقترب من وينحنى عليه) الأخ اسمه إيه ؟
- الرجل : (مترددا) عتريس بسطاويسى
- هدهد : (يمس على رأس الرجل ووجهه) خد بالك من نفسك يا بنى دول بيدوروا عليك من سنين .
- عتريس : (يقبل يد هدهد) إيدك أبوسها يا شيخ ، دا أنت مكشوف عنك الحجاب .
- هدهد : (يقدم له يده الأخرى ليقبلها) ح تقولهم على كل حاجة شفتها .
- عتريس : (مذعورا) ينقطع لسانى يا شيخ
- هدهد : ما تخفش يا عتريس ، ما حدش ح يوصلك
- عتريس : (يقبل أطراف ملايسه) دا أنت شيخ مبروك . ادعى لى يا شيخ والنبى .
- هدهد : يا لا يا فاصوليا نقعد هناك .
- فاصوليا : (يجلس) إيه الحكاية يا شيخ ومين عتريس ده ، ومين هم اللى مش ح يوصللوه ؟
- هدهد : (يمسك يده) دا مخبر يا فاصوليا .
- فاصوليا : (منتفضا) يا نهار أسود .. أنا جسمى لسه مكسر و...
- هدهد : يضع يده على فمه) اكرم .. ومش عايز ولا كلمة منك .. وقرب منى
- فاصوليا : طول الوقت وأنا مش عارف
- هدهد : وح تعرف منين .. أنا مش قلنتك أنك حمار .. المهم أنا دلوقت عرفن هم عايزين مننا إيه .. شوف يا ولد يا فاصوليا ... إحنا انفتحت لنا طاقة القدر ... وإما ج نسعد لآخر يوم فى حياتنا ، إما ح نطلع من هنا على القرافة أو المستشفى .
- فاصوليا : (حائرا) أنا مش فاهم حاجة خالص .
- هدهد : (يتمدد على الأرض) وإيه الغريب فى كده ... أنا ح أنام ومش عايز حد يصحبنى .. وبعد شوية ح يبجى واحد يخذنى للمأمور ... خليه يستينى وما يصحنيش ... غطينى يا فاصوليا
- فاصوليا : (متعجبا) أغطيك بإيه ؟
- هدهد : بخبتك .

(ستار)

مكتب المأمور (على) فى مركز الشرطة ... يدخل المأمور ووراءه عسكرى ، يجلس إلى مكتبه

- على : (ينظر إلى الزهور على مكتبه باشمنزاز) الورد ما تغييرش ليه يا عسكرى ؟
- العسكرى : (مشدودا) تمام يا أفندم .. المحل لسه ما فتحش . وسيادتك جى بدرى النهاردة
- على : (ناظرا فى ساعته) هو حد بينام اليومين دول .. حضرة الضابط فؤاد وصل ؟
- العسكرى : كان سهران للفجر ، وحضرة الصول مصطفى
- على : (مندهشا) وليه سهرانين للفجر ؟
- العسكرى : كان فيه حملة للقبض على المشتبه فيهم .
- على : وهما فين دلوقت ؟
- العسكرى : مرمين فى الحجز يا أفندم .
- على : (متعجبا) الضابط فؤاد والصول مصطفى !!
- العسكرى : لا يا أفندم ... المشتبه فيهم .
- على : (متضايقا) أنا بسأل على الضابط فؤاد والصول مصطفى .
- العسكرى : زمانهم على وصول يا أفندم
- على : (يتصفح الجرائد) اعلمى فنجان قهوة ... ما تعملوش أنت خلى الولد عتريس هو اللى يعمله
- العسكرى : مرمى فى الحجز يا أفندم .
- على : (غاضبا) هو أنا كل ما أسألك على حد تقوللى مرمى فى الحجز .. عتريس يا بنى آدم
- العسكرى : حضرة الضابط على حجزه مع المشتبه فيهم .
- على : (مفكرا) آه .. افتح الحجز وخرجه وخليه يعمل فنجان قهوة .
- العسكرى : (منصرفا) تمام يا أفندم .
- على : (يصفح الجرائد ويحدث نفسه) أنا اللى مستقبلى على كف عفريت ربنا يعدى الأيام اللى جاية على خير .
- عتريس : (يدخل حاملا القهوة) صباح الخير يا سعادة الباشا .
- على : (يتناول القهوة) حضرة الضابط كان حاجزك ليه ؟
- عتريس : (يمسح المقاعد والمنضدة وسط المكتب) حضرة الضابط قاللى نام الليلة فى الحجز .
- على : أنت مش ناوى ترجع لبلدك .. جواب نقلك موجود فى الدرج
- عتريس : ما أنت عارف يا سعادة الباشا معنى رجوعى للبلد .. الجتل
- على : وح تعيش طول عمرك فى القسم يا عتريس .
- عتريس : أمان يا سعادة الباشا .. مين يقدر يدخل يدور على فى القسم .. وجالوا فى الأمثال إيه اللى رماك على المر .. جالوا اللى أمر منه ، وأهوه .. أنا عايش فى بوفيه القسم آكل شارب نايم .. أحسن ما أندفن فى الصعيد .
- على : بس دى طريقة حياة يا عتريس ، لا جواز ولا خلفه .
- عتريس : إن كان عليا أنا عايز أتجوز النهاردة وأخلف بكرة
- على : (ضاحكا) تتجوز النهاردة وتخلف بكرة !!
- عتريس : ياريت تسمح يا سعادة الباشا .
- على : (مندهشا) أسمح بإيه يا مجنون !!
- عتريس : أتجوز هنا .
- على : فى القسم !!
- عتريس : لا فى البوفيه .
- على : وتخلف !!
- عتريس : فى البوفيه برضه
- على : لا دا أنت مجنون فعلا .
- عتريس : خلاص يا سعادة الباشا .. فيه أودة فى القسم هنا مقفولة على طول .. هات مفتاحها

- على : أنت ح تجيب واحدة تتجوزها ولا ح تسجنها !
- عتريس : ما هي الدنيا سجن كبير ... وإحنا كلنا مساجين .
- على : أنت عارف يا عتريس لولا فنجان القهوة اللي ما حدش يعرف يظبطه زيك ، وإخلاصك في خدمة البيت والأولاد أنا كنت نقلتك على الصعيد على طول .
- عتريس : دا أنا أخدمك أخدم بيت وأولاد سعادتك برقبتي .
- على : طاب روح شوف شغلك وما ضيعش فنجان القهوة من دماغى .
- عتريس : البيت مش عايز حاجة يا سعادة الباشا .
- على : (متذكرا) خد هات الحاجات المكتوبة هنا فى الورقة وروحا على البيت ... بس ما تتأخرش .
- عتريس : (منصرفا) حمامة يا سعادة الباشا
- فؤاد : (يدخل ويمسك بعتريس قبل أن ينصرف) صباح الخير يا أفندم .. أنت إيه اللي خرجك من الحجز يا مخبر ؟
- عتريس : حضرة المأمور .
- على : أنت كنت حاجزه ليه يا فؤاد ؟
- فؤاد : علشان يكشف ستر العجر اللي جوه .
- على : برافو عليك يا فؤاد .
- فؤاد : (يجلس) قوللى بأه إيه اللي عرفته عن المحتجزين ؟
- عتريس : (مترددا) ما عرفتش حاجة خالص .
- فؤاد : (مندهشا) ليه أنت مش كنت معاهم طول الليل .
- عتريس : أيوه بس أول ما دخلت ، كبس عليا النوم .. نمت .
- فؤاد : (ساخرا) والله ... تنام أثناء الخدمة ، وتأدية الواجب .
- عتريس : (مندهشا) خدمة وتأدية الواجب جوه الحجز !!
- فؤاد : أمال أنا حاجزك معاهم ليه ؟
- عتريس : (خانفا) أنا مش عارف إيه اللي خلانى أنام .
- مصطفى : (يدخل) صباح الخير يا سعادة المأمور . (مخاطبا عتريس) عملت إيه يا بطل .. أظنك معاك أخبار كتيرة عن المحجوزين .
- فؤاد : (ساخرا) المخبر عتريس قضى الليل نايم .
- مصطفى : (غاضبا) يا نهار أبوك أسود .. إحنا مدخلينك تنام ولا تسمع كل اللي بيدور بينهم .
- عتريس : (خانفا) ماهو أنا ... ما هو أنا .
- مصطفى : (رافعا يده ليضربه) ما هو أنت إيه .. أنت عايز تتسجن .. إحنا معتمدين عليك يا بجم .
- عتريس : (مرتعشا) بس أصل .. أنا واخذ عهد على نفسى .
- مصطفى : (مندهشا) عهد !! عهد إيه ؟
- عتريس : إنى ما أقولش على اللي أنا شفته .
- مصطفى : (يخلع حزامه) لا مواخدة يا سعادة الباشا ، لا مواخدة يا فؤاد بيه .. شوف يا عتريس أنا ح أقطع الحزام ده على جسمك .. عهد إيه يا خويا اللي أنت واخده على نفسك أنت ح تدروش من أولها .
- فؤاد : (يقدم مقعدلعتريس) أجلس يا عتريس وقول كل اللي شفته وسمعته
- مصطفى : (محذرا) بالحرف الواحد
- عتريس : (مرتعشا) أنا ح أقول كل حاجة .. هو عرف أى مخبر ، وأنى مدسوس عليهم ، مع أنه أعمى .. ومع كده عرف .
- مصطفى : هو مين ده ؟
- عتريس : (بخشوع) الشيخ عصفور .
- مصطفى : (غاضبا) ما فيش حد بلاسم ده يا مخبر .
- عتريس : أقصد الشيخ هدهد .. مولانا الشيخ هدهد .
- مصطفى : ماله الزفت هدهد ؟
- عتريس : (مقتربا من الضابط فؤاد) أكلهم كباب وكفته وسلطة طحينه .

- على : إش عرفك إنها خافيتها .
- فؤاد : دا اللي ح نعرفه دلوقت .
- على : والصحفي ده حابسه معاهم ؟
- فؤاد : لا .. ده له معاملة خاصة .. دا أنا خليته يبات في مكتبي معزز مكرم
- على : كويس كده .. إحنا مش ناقصين هجوم الصحافة علينا ، إحنا وضعنا لا نحسد عليه .. المهم
- خلينا نركز على الشيخ هدهد .. إيه معلوماتك عنه بإختصار .
- عتريس : دا شيخ مبروك ومكشوف عنه الحجاب .
- مصطفى : (يضربه على قفاه) بأمانة الخمرة والحشيش يا مخبر الغبرا .
- عتريس : وسلطة الطحينة .
- فؤاد : واضح يا أفندم أن الشيخ هدهد زى ما بيقول عتريس أهم واحد فيهم
- والمعلومات اللي قدرنا نجعلها عنه بتقول إن اسمه سفر عبد العزيز المازني ، وشهرته
- هدهد ، حصل على الثانوية الأزهرية ، مات والده ، وكان واحد من شيوخ الطرق الصوفية ،
- وبعد ما مات والده ، تزوجت أمه وتركته مع جده ، أصيب بمرض في عينيه ، دخل
- المستشفى وأجريت له عملية ، فقد عينيه بعدها ، انقطعت أخباره بعد كده بحوالي عشر
- سنين ، ثم بدأ اسمه يظهر وذاع صيته في البلد كلها ووصل إلى الخارج وبالأخص في دول
- الخليج .
- على : يعني أصبح عالمي .
- فؤاد : بعض القنوات الفضائية أجرت معه حوارات ، وكذلك عدد من الجرائد والمجلات .
- على : دا أنت شوقتنى إني أشوفه .
- عتريس : سعادة الباشا ح ياخذ العهد على إيده ؟
- مصطفى : (يضربه على قفاه) عهد إيه يا حمار ..
- على : والشيخ هدهد ده ما لو ش أتباع .
- فؤاد : دراعه اليمين شاب اسمه إبراهيم أبو أحمد .. وشهرته فاصوليا .. شبه مجنون ، على
- استعداد أنه يدافع عن شيخه إلى درجة القتل .
- على : وإيه خطتك دلوقت .
- فؤاد : (متعجبا) إني أقبض على العفريت
- على : (مندهشا) عفريت إيه يا فؤاد !!
- على : اللي حضرت كلفتني أني أقبض عليه
- على : آه ... أيوه .. همتك .. أنا عايز تقرير يومي والأهم عايزك ، توصل للعفريت بأقصى سرعة
- فؤاد : (يقدم له بعض الأوراق) عايز من سعادتك تمضي بعض الأوراق .
- مصطفى : (ينتحي جانبا بعتريس) قوللي يا ولد يا عتريس .. الكلام اللي بتقولها على الشيخ هدهد بجد
- وصحيح .
- عتريس : دا فيه حاجات كتيرة ما قلتهاش .. دا شيخ مكشوف عنه الحجاب .. دا عرفني وعرف اللي
- بيدوروا عليا ، مع إنه أول مرة يشوفني .
- مصطفى : (متأثرا) يشوفك إزاي يا ولد وهو أعمى !
- عتريس : والله ما حد أعمى إلا إحنا ... دا شاف الستات وعرفهم ووصفهم ، أنا بيتيألى أنه لو حب
- يخرج من السجن ح يخرج وما حدش يقدر يمنعه .
- مصطفى : (مندهشا) إزاي يخرج والباب مقفول عليه ؟
- عتريس : دا ما يمنعوش باب ولا شباك .
- مصطفى : (خانقا) على كجه دا ممكن ينتقم من اللي قبض عليه
- عتريس : شوف يا حضرة الصول .. اللي أنا شفته بعنيه وسمعتة بودني ودقته بلساني يقول أن
- الرجل ده في إمكانه يعمل أي حاجة .. هو شافك
- مصطفى : (مفزوعا) شافني ... دا أنا اللي قبضت عليه ، ووصيت المخبر فتحى عليه بس الحمد لله
- هو ماشافنيش لانه أعمى والحمد لله .
- عتريس : شوف يا حضرة الصول .. هو عرف اللي ضربه ، وعرف الجزم اللي كان لابستها ، وعرف
- إن فيها حديد من تحت وبرقبة ولونها أسود ، وحلف أنه ينتقم من المخبر .

يا نهار أسود .. دا فعلا وصف جزمة المخبر فتحي .. طاب جاب سيرتى ولا حاجة ... قللى	مصطفى
يا عتريس الله يصلح حالك يا خويا .. أنا مش ناقص يربطنى ولا يعمل حاجة .	عتريس
: (يتحسس قفاه) دلوقت يصلح حالك .. ومن شوية هات يا ضرب وهات يا شتيمة .	مصطفى
: (متوددا) ما أنت عارف إن الشويتين دول بنعملهم قدام حضرة المأمور وفؤاد بيه ، وأنت عارف غلاوتك عندى ، المهم أنا عايزك تتوسطلى عند الشيخ هدهد ، منه ما يعملش حاجة	
تضرنى ، ومنه يعمللى حاجة كده .	
: (متخابثا) حاجة زى إيه يا حضرة الصول .	عتريس
: (خجولا) حاجة كده ... أصل الجماعة بتوعى عايزين (منتبها) أنت مال أهلك ... مش	مصطفى
تحترم نفسك .	
: (متدخلا) فيه إيه يا حضرة الصول .	فؤاد
: (محرجا) لا يا سعادة البيه .. دا موضوع بينى وبين عتريس .	مصطفى
: روح طلع الشيخ هدهد من الحجز ووديه مكتبى .	فؤاد
: (يمسك بخناق عتريس) تعالى معايا	مصطفى
: (يتخلص منه) لا .. روح أنت حضرة المأمور عايزنى .	عتريس
: (يخفض من صوته) تعالى أحسن أسود نهارك ونهار أهلك ، أناجتى متلبشة .. وأنا مش	مصطفى
عارف أتعامل معاه إزاي .	
: (متعجبا) إيه يا حضرة الصول ... ما رحتش ليه تخرج الشيخ هدهد ... ثم أنت ماسك	فؤاد
عتريس ليه ؟	
: أصل مش ممكن أسيبه .	مصطفى
: (متعجبا) ليه !	فؤاد
: (مترددا) أصل ... أصل ..	مصطفى
: (غاضبا) أصل إيه ... بسرعة روح خرج الشيخ هدهد .	فؤاد
: (متوعدا) حاضر يا عتريس ، بتتخلى عنى دلوقت .	مصطفى
: روح وأنا جاى وراك على طول .. وأنت ح تاخذ العهد على إيديه .	عتريس
: (متوددا) أيوه يا خويا ... أنا مش ناقص .	مصطفى
: أمرك عجيب يا حضرة الصول ... أنت ماسك فى عتريس ليه ومش عايز تتحرك ؟	فؤاد
: (منصرفا) حاضر... وربنا يستر ، ما كنت أخذت أجازة وقعدت اليومين دول فى البيت ...	مصطفى
ربنا يستر ... ربنا يستر .	

(س ت ا ر)

مكتب الضابط فؤاد ، حجرة واسعة ، مكتب خشبي عليه بعض الملفات ، وخلفه نافذة مفتوحة تطل على فناء القسم ، منضدة وسط الحجرة ، فى جانب من الحجرة يوجد مقعد فوتيه يجلس عليه عباس بلطية وفى الجانب الآخر يجد برافان وخلفه سرير سفرى .. يقف عباس ويسير خطوات هنا وهناك ، ثم يعود ويجلس .

- فؤاد : (يدخل من الباب) صباح الخير يا أستاذ عباس .
عباس : (غاضبا) أنا عايز أعرف أنت حابسنى هنا ليه ؟
فؤاد : (متعجبا) أنا حابسك ؟ إزاي ... أنت هنا فى مكتبى ونايم طول الليل على سريرى .. والأكل بيتقدم لك والشاى والقهوة والجرايد ... دا حتى باب المكتب مفتوح طول الوقت .
عباس : امال تفسر بيايه إنكم تقبضوا عليا من على المقهى وسط الناس ، دول ما عطونيش فرصة أخذ أوراقى ونضارتى ، ثم إيه هى تهمنى ؟
فؤاد : إحنا ما قبضناش عليك إحنا تحفظنا عليك ، ثم ما حدش وجه لك أى تهمة .
عباس : وتفسر اللى حصللى بيايه ؟
فؤاد : (يجلس إلى المكتب) كل ما فى الأمر إحنا عايزين منك خدمة .
عباس : (ساخرا) أسلوب غريب فى طلب الخدمات ... وإيه هى الخدمة دى ؟
فؤاد : إنت عارف أن البلد راكبها عفريت و...
عباس : (ضاحكا) آخر حاجة كنت أتوقعها ... أنكم أنتم تصدقوا الخرافات والكلام الفارغ ده !!
فؤاد : (يخرج من درج مكتبه بعض الكتب) هى دى مش كتبك اللى أنت مألّفها عن العفريت والجن والشياطين والسحرة .
عباس : (ساخرا) واضح أنك ما قرأتش إلا العناوين يا حضرة الضابط وأنتمعدون .. لأن ما حدش بيقرأ فى الزمن ده .
فؤاد : (يترك الكتب جانبا) معاك حق أنا مايقراش غير الجرايد ومش كل اللى فيها وأهه فرصة أنك تعرفنى اللى فى الكتب دية ... عايز تقول فيها إيه
عباس : عايز أقول ما فيش عفاريت ولا جن ولا سحر ، الحاجات دى ما لهاش وجود إلا فى عقولكم .
فؤاد : دا أنت مجنون ... كل الناس بتقول حاجة ، وأنت بتقول حاجة تانية .
عباس : ما فيش مفكر أو مصلح إلا والناس قالوا عنه مجنون ... حتى النبى محمد صلى الله عليه وسلم ، وطلع كلامهم بعد كده غلط .
فؤاد : عايز تقول أن ما فيش عفريت و...
عباس : (مقاطعا) كلها خرافات .
فؤاد : وحالة البلد و...
عباس : (مقاطعا) أنتم قبل غيركم عارفين إيه السبب ، واللى أنتم بتعملوه بتروجوا الخرافات ، وتبعدوا الناس عن الحقيقة .
مصطفى : (يدخل ومعه الشيخ هدهد) أى خدمه يا شيخ هدهد .
هدهد : (يتسمع ويتشمم) شكرا يا أبو هانى ، ربنا يخليك . وإن شاء الله الليلة دى ، ح تكون راضى .
مصطفى : (ينحنى على يد مقبلا) دعواتك يا عم الشيخ .
هدهد : أنا عايز منك خدمة
مصطفى : أوامرك يا شيخ .
هدهد : تخلى الواد عتريس يعمل فنجان قهوة مضبوط من البن اللى بيعمل منه لسعادة الأمور .. ويبعت للواد فاصوليا كباية شاى . أصل دماغه بيوجعه
فؤاد : (مقتربا منه) مش عايز سيجارة معمرة بالحشيش .
هدهد : (ضاحكا) الحاجات دى ممنوعة على الأقل فى القسم يا فؤاد بيه .
فؤاد : (يضع يده على كتفه) بس أنتم كنتم بدخنوها جوه الحجز .
هدهد : (يمسك أصابع الضابط) شقاوة محجوزين بأه .

فؤاد : والكباب والكفتة .
هدهد : دى طفاسة محجوزين .
فؤاد : أنا عايز أسألك سوال .. إزاي دخلت الكباب والكفتة داخل الحجز .
هدهد : (ضاحكا) دا رزق يا فؤاد بيه
فؤاد : (متعجبا) وصل إزاي والباب مقفول وتم تفتيشك قبل ما تدخل
هدهد : هو فين الكباب والكفتة دلوقت يا فؤاد بيه ؟
فؤاد : معاك حق .

(يدخل عتريس ويقدم فنجان قهوة للشيخ)

هدهد : (يشرب) برافو عليك يا عتريس ، بس ما لكش حق تقدلى القهوة فى فنجان حضرة
المأمور .. بالك لو عرف ح يسفرك على الصعيد عدل .
عتريس : (يقبل يده) أى خدمة تانية يا سيدنا
هدهد : بارك الله فيك يا عتريس
مصطفى : (منصرفا) أى خدمة يا شيخ
هدهد : أنت مش مكتبك على يمين مكتب حضرة الضابط فؤاد ، لما أعوذ حاجة ح أبعث لك وأنا إن
شاء الله خارج النهاردة ، وأنت لما تعوذ حاجة تعاللى وأنت عارف العنوان
فؤاد : (مقتربا منه) أنا مش عارف أنت عملتهم إيه الصول مصطفى يبوس إيدك .. وعتريس
يبوس إيدك
هدهد : (مبتسما) والله يا حضرة الضابط أنا سايب إيدى واللى فى نفسه حاجة بيعملها .. وإيه
محبة ، ومحبة الناس كنز
فؤاد : وجبت منين الثقة فى إنك خارج النهاردة
هدهد : أنا قلت إن شاء الله
فؤاد : (يغلق الباب) خلاص يا شيخ هدهد ... بقينا لوحدنا
هدهد : (يشير حيث يقف عباس) والأستاذ القلقان ده
فؤاد : وأنت مش عارفه ولا إيه
هدهد : (يقف مادا يده) إزاي .. هو فيه حد ما يعرفهوش
عباس : (يصافحه) إزيك يا شيخ هدهد
هدهد : (مفكرا) ...أهى ... إزيك يا أستاذ عباس
فؤاد : دا أنت تعرفه كويس
هدهد : عباس ... دا صحفى عظيم وكاتب كبير
فؤاد : (ساخرا) قال يعنى قرئت الكتب اللى كتبها
هدهد : كل الكتب اللى كتبها واللى ح يكتبها
فؤاد : أكيد أنتم اتقابلتم قبل كده .
هدهد : كتير
فؤاد : وإيه رأيك فى اللى بيقوله فى كتبه
هدهد : دا رأى الاستاذ عباس يا فؤاد بيه
فؤاد : (يشعل سيجارة ويقدمها له) ورأيك أنت ؟
هدهد : (يدخن) رأيى معروف ... وأظن دا السبب إني هنا
فؤاد : كأنك عارف إحنا قبضنا عليك ليه
هدهد : طبعا
فؤاد : الظاهر إحنا مش ح نضيع وقتنا
هدهد : الوقت ضيق يا فؤاد بيه، وحالة البلد مقلوبة ، والله أعلم إيه اللى حيحصل الساعة الجاية .
فؤاد : يعنى أنت مقدر أن الوضع خطير
هدهد : أخطر مما يتصوره إنسان .
فؤاد : (يحضر مقعدا ويجلس أمام هدهد) وطلباتك

- هدهد : (مفكرا) جنيه مصرى .
- فؤاد : (متعجبا) جنيه ... بس !!
- هدهد : كفاية الواحد مش طماع
- فؤاد : (يخرج جنيهها من جيبه) خد أدى الجنيه
- هدهد : (يأخذه) أدى أول واحد دفع
- فؤاد : قصدك إيه؟! :
- هدهد : هو إحنا عددنا كام إن شاء الله ؟
- فؤاد : عدد مين ؟
- هدهد : مصر المحروسة
- فؤاد : (مفكرا) حوالى سبعين أو ثمانين مليون
- هدهد : عايز ثمانين مليون جنيا مصريا لا غير
- فؤاد : (واقفا) ثمانين مليون ... أنت مجنون
- هدهد : كتير أن كل واحد فى البلد يدفع جنيه واحد علشان البلد تتخلص من العفريت
- فؤاد : (مأخوذاً) بس ده جنون ثمانين مليون
- هدهد : إيه يا فؤاد بيه .. راحة البلد ما تساويش ثمانين مليون جنيه
- فؤاد : ووح تعمل إيه بالفلوس دى كلها
- هدهد : دى مجرد رشوة للعفريت علشان أفتح معه كلام
- فؤاد : (غاضبا) ثمانين مليون جنيه رشوة ... ثم هى العفريت بتأخذ رشوة
- هدهد : (ضاحكا) اتعلموا من البنى آدمين .. كانوا الأول ما بياخدوش وبعد كده اتعلموا ... فى البداية كانوا بياخدوا حاجات رمزية ... وبعد كدة أفتروا .
- فؤاد : وبعد ما تفتح معاه كلام
- هدهد : أشوف شروطهم .
- فؤاد : (متعجبا) شروط مين ؟
- هدهد : شروط العفريت .
- فؤاد : والعفريت اللي أخذ الثمانين مليون
- هدهد : أنت ح تلبس العفريت تهمة .. هو لسة أخذ حاجة .
- فؤاد : يا سيدى العفريت اللي ح يأخذ الفلوس
- هدهد : دا واسطة بنا وبينهم .. هو أنت فإكر أن اللي راكب البلد عفريت واحد
- فؤاد : (مندهشا) أمال كام ؟
- هدهد : (مفكرا) لا ... هم مش كتير .. يتعدوا على صوبع اليد
- فؤاد : (ساخرا) وتفكر طلباتهم ح تكون إيه ؟ أظن عايزين عصفور يتيم ، وديك فى جسمه
- هدهد : ريشة صفرا وريشة حمرا .. وبيضة من غير صفار و .
- فؤاد : (ضاحكا) لا دى لا مواخدة طلبات العفريت الصايعة ، كل اللي يقدرنا يعملوه يلبسوا
- هدهد : واحد ، يعفرتوا واحدة .
- فؤاد : أمال ح يكون طلباتهم إيه ؟
- هدهد : (يضع قدما فوق الأخرى) والله يا فؤاد بيه الموضوع ده أنا ما تعملتش معاه قبل كده ... أكذب عليك لو قتلتك طلباتهم إيه وشروطهم إيه .
- عباس : (متدخلا فى الكلام) طبعا أنت مش مقتنع بالكلام ده يا حضرة الضابط . لانه كلام مجانيين ودجالين ، والرجل ده بيعد لأكبر عملية نصب فى التاريخ ، والكلام ده أنا ح أكتبه وأنشره أفصح كل المشتركين فيه
- هدهد : (يقف ويتقدم نحو عباس ويمد يده ويتحسس ربطة الكرافطة) يا أستاذ عباس أنت بتنكر شئ موجود .. وإحنا قعدنا أكثر من مرة وإتكلما قبل قبل كدة . بس دلوقت الوضع مختلف .. أنت دلوقت بتنكر حاجة البلد معترفة بيها .. وفى ناس بيقولوا إنهم شافوه ، وإتكلموا معاه ، والأحداث والمصايب والكوارث اللي بتحصل كل يوم وكل ساعة
- عباس : فيه تفسير علمى ومنطقى لكل ما يحدث .
- فؤاد : (متدخلا فى الحديث) بس أهل العلم والمنطق عجزوا

عباس : وده مش معناه إنى ألقا إلى الدجل والسحر والشعوذة
فؤاد : أنا عايزك تنزل فى الشوارع والحوارى والقهاوى والنوادى والاسواق .. كل الناس بتقول
بحكاية العفريت .. مش معقول ح نكذب الملايين دى وأصدقك أنت
عباس : أنا ح أسأل حضرتك سؤال واحد ، وح أسأل الشيخ هدهد نفس السؤال وجاوبنى عليه
بصراحة ... ليه العفريت اختار بلدنا دوننا عن بقية بلاد العالم ؟
هدهد : يا سلام .. دا سؤال ساهل .. يا بنى العفريت اختار مصر دوننا عن بقية بلاد العالم كله
علشان مصر هى أم الدنيا .. العفريت عنده نظر ، مش ح يروح على أى بلد هفية ويركبها ،
على رأى المثل .. إن عشقت إعشق قمر إن ركبت إركب جمل
عباس : بطلوا كلام فارغ .. مصر ما هيش أم الدنيا .. مصر بلد غلبان بيكدح من طلعة الشمس لحد
المغرب علشان ياكل لقمته بكل شرف وكرامة ، وببيضحى بكل شئ علشان يتن حر أبى ..
وأنتم اللى ح تودوا البلد فى داهية بالخرافات والدجل

(يدخل زكريا ويصافح فؤاد ويفاجئ بوجود الشيخ هدهد وعباس)

زكريا : (مندهشا) أنت هما من إمتى .. وإيه اللى جابك هنا ؟ إحنا كنا فاكرين أن العفريت خطفك
عباس : اسأل حضرة الضابط ... قبضوا عليا من على القهوة لما كنت قاعد فى امان الله معاكم
زكريا : (يصافح هدهد) إزيك يا شيخ هدهد (مخاطبا فؤاد) طالما عباس هنا والشيخ هدهد ..
أظنكم توصلتم لحاجة
فؤاد : (متعجبا) حاجة زى إيه ؟!
زكريا : حاجة متعلقة بالعفريت
فؤاد : الأستاذ عباس بيقول ما فيش عفريت وكله كلام خرافات وخزعبلات
زكريا : إزاي .. وكل يوم بتحصل حاجة جديدة .. النار بتولع فى المصانع من غير سبب ، مواسير
المية بتنفجر ، أسلاك الكهرباء بتولع ، عمارات لسة مبنية بتقع ، ناس بتتخطف وتختفى فى
ظروف غامضة ، لدرجة إنهم قالوا إن الأهرام اختفت
فؤاد : (مندهشا) التلاتة !!
زكريا : لقوا الهرم الصغير فى المقطم ، ولسه بيدوروا على الاتنين التانيين .
فؤاد : وأبو الهول حصله حاجة ؟
زكريا : عاملين عليه حراسة مشددة وماتعين عنه الزيارة
فؤاد : إيه رأيك يا أستاذ عباس .. لسه عند رأيك .
عباس : شوف يا حضرة الضابط ... لو العفريت ظهر لى وقاللى أنا العفريت ، أنا مش ح أصدق
عينى
هدهد : (ضاحكا) صدق العفريت وكذب عينك
عباس : تصدق حاجة مش موجودة
هدهد : أثره وأفعاله موجودة
عباس : إيه الدليل على أن ده أثر وأفعال العفريت .
هدهد : زى ما قاللك الأستاذ زكريا .. الناس كل الناس بتقول ، ثم أنك مش معنى أنك ما تقدرش
تثبت حاجة أنك تنفيها
عباس : الناس من غلبهم وقلة حيلتهم اخترعوا العفريت والمعوولين من عجزهم وفشلهم أكدوا
وصدقوا الاختراع ده
فؤاد : إزاي الكلام ده .
عباس : (ساخرا) الدليل أهه .. الشيخ هدهد هنا ، وفيه أوامر عندك بالقبض على العفريت
هدهد : (مندهشا) حد يقر يقبض على العفريت !!
فؤاد : أمال أنت بتعمل إيه هنا وجايبينك ليه .
هدهد : (واقفا منفعلا) واد يا عتريس .. ودينى الحجز يا ولد ، انتم ح تودونا فى داهية ... نقبض
على العفريت !! ما كنش حد غلب ، ثم أنت ح تحبسه فىن دا لو قدرت تمسكه
عباس : (ضاحكا) تحبسه فى قمقم وترمى القمقم فى بحر الظلمات العميق (يضرب كفا بكف)

- لا حول ولا قوة إلا بالله .. إنا فين؟! في عالم ألف ليلة وليلة وعلاء الدين والسندباد السحري ، حقيقى أنتم مجانين... مجانين .
- فؤاد : اقعد يا شيخ هدهد .. ما تسمعش كلام الأستاذ عباس .
- عباس : طبعاً لأنى مجنون ... طاب أنا ح أتحدى الشيخ هدهد وح أفضحه وح أكشفه وح أعريه قدامكم
- هدهد : طاب تفضحنى وتكشفننى ماشى .. إنما ح تعرينى ليه هو أنا ح أدخل مسابقة ملكات الجمال.
- زكريا : (ضاحكا) هو أنت بتشوف ملكات الجمال يا شيخ هدهد ؟
- هدهد : (ساخرا) لا بأحسس عليهم .. إنتم لا مؤاخذة ما بتشفوش .
- فؤاد : والله فكرة جميلة حكاية التحدى دى .. يا أستاذ عباس وأنت يا شيخ هدهد... قبلتم التحدى ؟
- هدهد : هو لا مؤاخذة ح يتحدانى ليه ؟ ما يروح يتحى العفريت .
- فؤاد : شوف يا شيخ هدهد الأستاذ عباس بينكر وجود العفريت وأنت بتأكده
- هدهد : مش أنا اللى بأكد وجوده ... دا كل الناس ، فالتحدى بين الناس وبين الأستاذ عباس
- فؤاد : وأنت إيه وضعك بالضبط .
- هدهد : أنا ح أخذ التمانين مليون
- فؤاد : (مندهشا) تاخدهم
- هدهد : أقصد أديهم للعفريت
- فؤاد : يا أستاذ عباس التحدى يبدأ من اللحظة دى
- عباس : (مفكرا) قللى يا شيخ هدهد .. ج نفرض زى الناس ما بتقول .. بس البلد راكبها عفريت ولا معملها عمل ؟
- هدهد : (وكأنه يحدث نفسه) الحكاية دى ما فكرتش فيها (يرفع صوته) شوف يا أستاذ عباس .. أنا لحد دلوقت ما بدأتش الشغل .. وأنت عارف كويس إنى ما أبدأش الشغل قبل ما آخذ العربون .. واللى أنت بتسأل عنه من صميم الشغل .. وأنا لسه ما أشتغلش علشان إيه يا حبيبي ؟ علشان ما أخذتش عربون .
- عباس : (بعصبية وتوتر) شوفوا ... بدأ يهرب ويراوغ زى التعلب .. أنا قلت ح أفضحه .. ح أكشفه .. ح أعريه قدامكم .
- هدهد : هو الأستاذ عباس بيشتغل فى قناة من قنوات البرونوولا إيه ؟ ! إيه حكاية العرى دى يا أستاذ عباس .
- فؤاد : يا شيخ هدهد ... العربون اللى أنت عايزه ح تاخده بس جاوب الأستاذ عباس .
- هدهد : مع إنى ما بأحطش إيدى فى أى شغل قبل ما آخذ العربون ، ومع ذلك أنا ح أريح الأستاذ عباس ... شوف يا أستاذ عباس ، البلد ممكن يكون راكبها عفريت لأن معملها عمل ، وممكن يكون معمول لها عمل علشان كده راكبها عفريت .
- زكريا : (يخرج ورقا ويكتب) بروفيسور والله ... زى ما بيقولوا عنك .
- عباس : معاك حق بروفيسور فى الدجل والنصب .
- هدهد : وماله المهم تبعد عن حكاية العرى دى ، وتخلينى متغطى بهدومى . عباس :
- هدهد : ماشى أنا معاك مين اللى عمل العمل للبلد ؟
- هدهد : كتير يا أستاذ كتير .
- عباس : زى مين ؟
- هدهد : (مفكرا) برضه ده من صلب الشغل ، وأنا ما أخذتش لحد دلوقت العربون
- عباس : شوفوا ... كل ما أزنقه يقول العربون والشغل
- فؤاد : قول له زى مين يا شيخ هدهد ؟
- هدهد : زى الجماعات الإرهابية ، وبعض أحزاب المعارضة ، وبعض رجال الأعمال الجشعين ... وفى ناس فى الخارج أنتم عارفينهم كويس
- زكريا : (يكتب) على كده يا شيخ هدهد ... دا العفريت ممكن نعتبره من أسلحة الدمار الشامل .
- هدهد : أنت كده ح تخلى (البرادعى) يجينا على أول طيارة ، وبعدين أنا مش حمل جوائنتامو....

وأنت عارف بوش ودماعه جزمة .. ولا رامسفيلد والتتنيحه بتاعته ، وتحكمات الأنسة كونداليزرايس

زكريا : (مندهشا) دا أنت بتفهم فى السياسة أهه .

هدهد : هى دى سياسة يبني اللي بيعملوها .

زكريا : آمال إيه .

هدهد : قول بلطجة ، فتونة .. عصابة من رجال الكابوى ، يا سلام يا زكريا على الكايبوى بتاع زمان .. جون ديوى ودين مارتن ، ولى فان كليف ، وكلنت أستود .. كانت أفلام جميلة .. بس الكايبوى زمان كان عندهم أخلاق وفروسية .. أحفادهم دلوقت كدايين ونصابين وبيلعبوا بالتلت ورقات .. إنما الحق علينا إحنا اللي نستاهل ضرب الجزمة .. ضعفنا وخضعنا و..

فؤاد : بلاش كلام فى السياسة يا شيخ هدهد

هدهد : ميسوط يا عم عباس ، أدينا أشتغلنا من غير ما ناخذ عربون .. وبعدين يقولوا بلاش كلام فى السياسة ..

عباس : فرضنا زى ما بتقول أن فيه ناس هم اللي عاملين عمل للبلد . هم ح يستفيدوا إيه؟

هدهد : لا يا حبيبي دا شغل العفريت مش شغلى أنا .

زكريا : إحنا هنا عاملين نتكلم والبلد حالتها مقلوبة

فؤاد : معاك حق يا أستاذ زكريا ... الشيخ هدهد ما عملش حاجة لحد دلوقت

هدهد : هو أنا ممانع

فؤاد : وإيه اللي معطلك دلوقت ؟

هدهد : الشوط اللي عرضتها عليك

فؤاد : تقصد الفلوس

هدهد : طبعا

فؤاد : أنا موافق أبدأ الشغل

هدهد : لا مواخذا يا فؤاد بيه الاتفاق لابد يكون على أعلى المستويات

فؤاد : مش فاهم

زكريا : الشيخ هدهد عايز الاتفاق يكون بينه وبين الأمور .

هدهد : يا ريت .

فؤاد : (مندهشا) مع مدير الأمن .

هدهد : كان بودى .

زكريا : مع وزير الداخلية .

هدهد : ما كنتش متأخر

فؤاد : مع رئيس الوزراء .

هدهد : كنت أتمنى .

فؤاد : (غاضبا) لا دا أنت عايز تتسجن وتتأذب .

هدهد : يا فؤاد بيه أنت سبق وأتعملت مع العفريت قبل كده .

فؤاد : ما حصليش الشرف .

هدهد : دول ما بيتقوش فى حد ، فالتعامل معاهم لابد يكون على أعلى المستويات .. ولا الحكاية ممكن تتدهور .

فؤاد : ما أنت طلباتك لابد تكون معقولة يا شيخ هدهد .

عباس : (ساخرا) الشيخ هدهد عايز يتعامل مع العفريت حسب البرتكول الدولى .

زكريا : من ناحيتك شوية يا شيخ هدهد ... وأنت لابد تراعى الظروف .

هدهد : والله يا جماعة أنا ح أحاول أن يكون الاتفاق مع وزير الداخلية

زكريا : أظن أن ده ح يكون صعب يا شيخ هدهد .

هدهد : خلاص ... مع مدير الأمن .

فؤاد : مش ممكن .

هدهد : أظن مش ممكن أقبا أقل من الأمور .

فؤاد : خلاص دى ممكن نقدر عليها .

- هدهد : وهيه فين دلوقت ؟
- فؤاد : (مندهشا) هيه إيه ؟!
- هدهد : التمانين مليون .
- فؤاد : جاهزة .
- هدهد : جاهزة إزاي ... وإنتم لحقتم تلموهم
- فؤاد : هو معقول ح نفوت على كل واحد من التمانين مليون وناخد من كل واحد جنيه
- هدهد : وح تجبوها منين ؟
- فؤاد : الفلوس جاهزة وتحت إيدنا ومتوفرة .
- هدهد : أمال إيه الكلام اللي بنسمعه دايمًا من الحكومة .
- فؤاد : كلام إيه ؟
- هدهد : إن البلد مديونة والاقتصاد تعبان وأبصر إيه .
- فؤاد : لا ما الحكومة بتحط فلوس على جنب للطوارئ .
- هدهد : ما إحنا على طول فى حالة طوارئ .
- فؤاد : (محذرا) شيخ هدهد .
- هدهد : طاب سؤال أخير .
- فؤاد : وبعدين فى العطلة دى .
- هدهد : صندوق النقد الدولى ح يعرف حاجة على التمانين مليون .
- فؤاد : (متعجبا) وأنت مالك بصندوق النقد الدولى !!
- هدهد : أنا مش عايز حد ينق علينا صراحة .
- فؤاد : استريح يا سيدى ما حدش ح يعرف
- هدهد : عشرات ولا ميات
- فؤاد : هو إيه ؟
- هدهد : التمانين مليون
- فؤاد : هو أنت فاكرا إننا ح نجيب لك التمانين مليون .
- هدهد : أمال إيه ؟
- فؤاد : إحنا ح نفتح لك حساب فى البنك وأنت تتصرف زى ما أنت عايز .
- عباس : (ضاحكا) والحساب ده باسم الشيخ هدهد ولا باسم العفريت ، والتمانين مليون دول تحت
- أى بند من بنود الصرف ، والجهاز المركزى للمحاسبات ح يكون عنده خبر ولا لا وأنتم
- عرفتوا رأى الناس اللي ح تدفع من دم قلبها للنصب والدجل ، والشيخ هدهد ح يقدم كشف
- حساب لأوجه الصرف ...
- هدهد : (مقاطعا) يا بنى ما النصب والسرقه فى البلد على ودنه ، والكل بيهلب ويطلع على برة ،
- جت على التمانين مليون ملتوش
- عباس : أنا شايف قدامى (راسبوتين) بكل جشعه وطمعه وشرهه .
- هدهد : (مستفسرا) دا نوع من البسكويت ولا إيه ؟
- زكريا : اهدأ يا أستاذ عباس ، إحنا بنضيع وقت ومحتاجين للشيخ هدهد .
- عباس : (ساخرا) قصدك البلد كلها محتاجة للشيخ هدهد .
- فؤاد : يا لا .. همتك يا شيخ هدهد ، وأبدأ شوف حكاية العفريت ولا العفاريت .
- هدهد : (مندهشا) إمتى ؟
- فؤاد : دلوقت .
- هدهد : فين ؟
- فؤاد : هنا .
- هدهد : لا... دى حكاية عايزة ترتيبات وتجهيزات كبيرة .
- زكريا : قصدك الاتصال بالعفريت ؟
- عباس : (ساخرا) ليه ما يتصل به على النت .
- هدهد : (ضاحكا) أصل العفريت ما لوش إميل علشان أتصل بيه .
- فؤاد : (بضيق) يعنى عايز إيه يا شيخ هدهد ؟

هدهد : (يضع قدما فوق الأخرى) أنا أرجع بيتي واستريح يوم ولا يومين ، وبعد كده تدونى فرصة يومين ولا ثلاثة .

فؤاد : (غاضبا) أنت مجنون ولا إيه .. أنت مش مقدر حالة البلد .

هدهد : يا فؤاد بيه ... الواحد لما يحب يقابل المحافظ ولا الوزير بيعمل إيه ؟

فؤاد : بيقدم طلب .

هدهد : عليك نور وينتظر قد إيه ؟

فؤاد : يومين ... ثلاثة أسبوع .

هدهد : وجايز يوافقوا على طلبه وجايز يرفضوه .

فؤاد : ممكن .

هدهد : إش حال مقابلة العفريت ... وبعدين أنا فى إيدى شغل ومصالح ناس ، والناس دول منتظرين .

فؤاد : (غاضبا وضاربا سطح المكتب بانفعال شديد) يا بنى آدم ... أنا بأقولك حالة البلد كلها تقوللى مصالح ناس وشغل فى إيدك ومش عارف إيه .

(يدخل المأمور فجأة متجها إلى فؤاد غاضبا)

على : عملت إيه يا فؤاد ... المديرية مقلوبة ، ومدير الأمن مستدعيني ... أنا مش عارف ح أقوله إيه .

زكريا : (مقتربا منه) صباح الخير ...

على : (منتبها) أنت هنا يا زكريا ... كويس .. أنا عايزك علشان تنزل أخبار فى المجلة بتاعتك .

زكريا : (ناظرا إلى الشيخ هدهد) وده مين اللي قاعد ده ؟

هدهد : (مخاطبا هدهد) قوم أقف دا حضرة المأمور .

هدهد : أيوه ... بس أنا لا شايف عسكري ولا مأمور .

على : (يصافحه) أهلا وسهلا .. دا أنت معارفك كثير ، وعلى أعلى المستويات ، التليفونات من الصبح بتسأل عنك ، وفى ناس فى مكتبى عايزة تشوفك

هدهد : وأنا والله مشتاق إنى أشوفهم

على : بس أنا قتلهم إنكم مستحيل تشفوه أو يشوفكم

هدهد : طاب أنا مستحيل أشوفهم .. وهم مستحيل يشوفونى ليه ؟

على : لأنك فى مهمة سرية تمس أمن البلد (ملتفتا إلى فؤاد) الله .. أنت ما فهمتهوش ولا إيه يا فؤاد ..

فؤاد : (مقتربا منه وبصوت خافض) فهمته كل حاجة ... بس هو طالب تمانين مليون جنيه .

على : (مفزوعا) تمانين مليون جنيه ... وح يعمل بيهم إيه ؟

فؤاد : دول للعفريت .

على : (مندهشا) عفريت إيه يا فؤاد !؟

فؤاد : اللي راكب البلد .

على : (ممسكا رأسه) آه ... أيوه اللي راكب البلد .

فؤاد : وهو عايز وعد منك شخصا .

على : (مندهشا) وعد بيايه ؟

فؤاد : التمانين مليون جنيه .

على : وأنت ما وعدتوش ليه يا فؤاد .

فؤاد : يا أفندم دا كان عايز الوعد من مستويات عليا ، بس أنا أقنعتة يا خد الوعد من مستويات أقل .

على : مستويات أقل !!

فؤاد : (معتذرا) لا مواخذة يا أفندم ، أهو قدام حضرتك أهه .

على : يالا يا شيخ هدهد ، ورينا همتهك .. وكل طلباتك مجابة .

هدهد : ٩٥٧٤٨ :

- على : هو إيه ده ؟
- هدهد : دا رقم حسابى فى البنك علشان تحطوا الفلوس فى البنك .
- فؤاد : (مندهشاً) هى الفلوس دى لك ولا للعفريت ؟
- هدهد : (ضاحكا) يا فؤاد بيه أرقام حساب العفريت كلها سرية ، ما أنتم عارفين ده كويس .
- على : البلد مش ح تنسى لك العمل ده يا شيخ هدهد .
- هدهد : لا مؤاخذه با سعادة الباشا ... انا لا عايز تمثال ينحط لى فى ميدان الأوبرا ، وشارع يتسمى باسمى ولا ميدالية ذهبية ولا برونزية ، و لاشهادة تقدير .
- على : (غاضبا) آمال عايز إيه ؟
- هدهد : التمانين مليون .
- على : خلاص التمانين مليون ح يكونوا جاهزين ... بس يوم ولا يومين ... أنت عارف ما فيش سيولة فى البلد
- هدهد : شوف يا حضرة المأمور ... لا حجج وزير الاقتصاد ولا وزير المالية ولا وزير الخزانة تخيل على العفريت دا عفريت واللعب معاه خطر .
- على : مش ممكن يا شيخ هدهد أنت برضه مواطن مصرى ويهمك أمن ومصحة البلد .
- عباس : أمن ومصحة البلد فى إيد دجال ونصاب ... لك الله يا مصر لك الله يا مصر...
- على : (مندهشاً) ودا مين يا فؤاد اللي بيزعق ده ؟
- فؤاد : (بصوت خافت) دا الأستاذ عباس اللي كلمتك عنه .
- على : ودا قاعد هنا ليه لزمته إيه ... ما تروحه ولا إرميه فى الحجز دلوقت .
- فؤاد : ما هو ده الوحيد اللي يكشف هدهد ، إن الشيخ هدهد حب يلعب بديله لأنه عنده خبرة طويلة
- على : مش فاهم ؟
- فؤاد : إحنا نعرف منين إن الشيخ هدهد بيشتغل بجد ولا بينصب علينا... وحضرتك ما لكش خبرة بشغل العفريت ولا أنا
- على : معاك حق ... يعنى عباس ده ح يكون عين على هدهد .
- فؤاد : بالضبط يا أفندم .
- على : (منصرفاً) همتك يا فؤاد ... أنا رايح النهاردة لمدير الأمن وعايز تقرير وعايز أشوف حاجة اتعملت مع العفريت ده .. يا لا اتصرف .. واتفاهم مع هدهد ولبيله كل طلباته .
- هدهد : يا سعادة الباشا المأمور ...
- فؤاد : خرج يا شيخ هدهد ... كنت عايز حاجة .
- هدهد : والله أنا كنت عايز منه كارت توصية علشان واحد معرفة عايز يدخل ابنه كلية الشرطة .
- فؤاد : (غاضبا) وده وقته يا عم إحنا ح ندخل كل معارفك كلية الطيران ..بس يالا شوف شغلك .
- هدهد : وشروطى
- فؤاد : كل شروطك مجابهه .
- هدهد : إن كان كده على خيرة الله .
- فؤاد : بس أنا لى شرط .
- هدهد : إيه هوه ؟
- فؤاد : الأستاذ عباس يكون معاك وملازمك على طول .
- هدهد : كده أنا مش ح أعرف اشتغل .
- عباس : وأنا مش موافق ... أنا لأزم الدجال ده .
- فؤاد : أنت رجعت عن تحديك ولا إيه يا أستاذ عباس .
- هدهد : إذا كانت مسألة تحدى ، ما فيش مانع ... يتفضل معايا .
- عباس : وأنا مستحيل أرجع عن تحدى الشيخ هدهد ، ويا أنا يا أنت يا هدهد

(ستار)

الفصل الثالث

مقهى (العفش) أعمال الترميم داخل المقهى تجرى على قدم وساق ، الزبائن يجلسون خارج المقهى ، على اليمين مجموعة من الرجال ، وعلى اليسار مجموعة من الشباب .. يدخل أبو جابر وينادي على (رابسو)

أبو جابر : (ناظرا حوله) القهوة رجعت واتملت تانى .. هو الناس ما عدوش يخافوا من العفريت ولا إيه .

رابسو : البركة فى الشيخ هدهد ... أنت ما بتقراش الجرايد ولا إيه .

أبو جابر : باقرايا خويا ... والله الواحد ما هو عارف يصدق حكاية العفريت ولا ما يصدقهاش

رابسو : إزاي يا معلم ، ما اللي حصل للقهوة قدام عينك ، وفى لحظة ولعت من غير سبب ، وإختفى

الأستاذ عباس واتنين من الزباين ما ظهوروش لحدلولت ، وحاجات كتيرة أختفت من القهوة فى الليلة السودا (يقترب منه) وحاجات كنت لابسها ما لقتهاش .

أبو جابر : (ضاحكا وضاربا رابسو على قفاه) أنت كده ح تطلع سمعة مش كويسة على العفريت

(يتقدم من مجموعة الشباب) إزيك يا أساتذة .. إزيك يا أستاذ جابر ما عدتتش أشوفك إلا هنا ... أكل شارب فى القهوة ، ناقص تنام هنا كمان .

شاب (١) : ما تخذنى يا معلم اشتغل عندك فى المطعم طالما جابر مش عايزولا نيحى كلنا كده بربطة المعلم نشتغل عندك .

أبو جابر : معلش يا أستاذ أحمد .. وإن كنتم ح تزعلوا منى أنتم ما تنفعوش فى حاجة خالص .

جابر : (غاضبا) يعنى أسيب المكان وأمشى علشان تستريح .

أبو جابر : (ساخرا) أهه ... أول ما أتكلم فى الموضوع ده ... ودانه تحمر ويعوج لى رقبتة ... دى

حقيقة يا بنى .. أنتم ما تنفعوش فى حاجة .. كل واحد منكم خد الشهادة حاسس إنه عمل اللى عليه ، هى الشهادة دى مش حتة ورقة ، طلعت نزلت حتة ورقة .. بعنى ممكن نلف فيها نص كيلو سمك .. وانتم لو تنفعوا فى حاجة كنتم قعدتم هنا طول النهار والليل ... ثم أنتم

لو كان لكم قيمة كان العفريت ظهر فى البلد .

أحمد : (ضاحكا) وإحنا مالنا ومال العفريت يا معلم .

أبو جابر : إزاي يا أستاذ أحمد تفوت عليك الحكاية دى ، وأنت اللى متعلم وواحد شهادة كبيرة ..هى البلد دى لو حافظتة مقامها كان العفريت استجراً وداس لها على طرف

جابر : طاب مالنا إحنا ومال البلد ؟

أبو جابر : ها أو أو .. أو .. مش إنتم زى ما بيقولوا وواجعين دماغنا سلاح البلد وعماد البلد وأبصر إيه ومدرك إيه .

شاب (٢) : بس يا معلم البلد رمت سلاحها لحد ما صدا وأكلته البرومة .

شاب (٢) : يا رتها رمته .. دا باعته ..زى ما بتبيع كل حاجة .

أبو جابر : (يذهب إلى الركن الأيمن ويجلس) أنا ما أفهمش حاجة فى السياسة ولا الاقتصاد ... أنا رجل علامى على قدى ، وخلينا فى حكاية العفريت ... ألا يا أساتذة إنتم مصدقين حكاية العفريت دى ؟

أحمد : أنت مش قلت من يومين ما عفريت إلا بنى آدم ؟

أبو جابر : إيوه يا أخى ... بس اللى بيحصل ح يخلى الواحد يتجنن ويصدق إن فيه عفريت بجد .

حناطة : (يدخل حاملا حقيبته فى يد وفى اليد الأخرى جريدة) سلام عليكموا يا قوم .أبو جابر : إيه آخر أخبار العفريت يا أستاذ حناطة ؟

حناطة : (يجلس ويفتح الجريدة) مكتوب هنا إن الحكومة الرشيدة عهدت الأمر إلى أكبر خبير فى أعمال العفرتة .

أبو جابر : (مندهشا) هم أهل البلاد البرانية يعرفوا فى الحكايات دى .

حناطة : ومين قال إنه من بلاد برة ؟

أبو جابر : هو الخبير ده مش زى الحكم الدولى اللى بيحبوه فى ماتش الأهلى والزمالك ، ثم أنا عارف

إن الخبير لابد يكون برانى ما فيش خبير جوانى

حناطة : لا دا الخبير ده اسمه الشيخ هدهد وح ياخذ تمانين مليون جنيه

- أبو جابر : (يقف مندهشا) يا خبر مبطرخ ..ثمانين مليون جنيهه علشان عفريت !!
حناطة : هو مش قالب حالة البلد كلها .
- أبو جابر : (ناظرًا في الجريدة) على كده .. دى حكاية العفريت بحق وحقيقى .
أبو جابر : إنت لحد دلوقت مش مصدق .
أبو جابر : طالما دخلت الثمانين مليون جنيهه كده أنا مصدق .
حناطة : وهى الثمانين مليون هى اللى خلت حكاية العفريت بجد
أبو جابر : يا أستاذ أنا ابن سوق وبأفهم .. أى كلام فى العالم كله ممكن يكون كلام فارغ وفك مجالس .. بس لو دخلت الفلوس ما عدش كلام فارغ ... بيكون كلام بيدبح .. بس ح يجيبوا الفلوس منين والحكومة ليل نهار بتغنى موال الصبر .. وإنها يا والداه ما معاهش اللضى ، والتمانين مليون مش مبلغ بسيط .
- حناطة : لا ... هم ربعميت مليون ... ح تفرض الحكومة على كل مواطن خمسة جنيهه .
أبو جابر : (يمسك رأسه) أنت برجلت دماغى ... هم ثمانين مليون ولا ربعميت مليون ؟
حناطة : المطلوب ثمانين مليون والحكومة ح تلم ربعميت مليون .
أبو جابر : (متعجبا) والفرق الكبير ده ح تعمل بيه إيه .. ولزمته إيه .
حناطة : أكيد ضريبة مبيعات أو رسوم إدارية ... مبلغ كبير زى كده مش ممكن يمر من تحت إيد مصلحة الضرائب
- أبو جابر : (يضع قدما فوق الأخرى) وأنتم يا مصلحة الضرائب ح تعملوا ملف ضريبي للعفريت ده إزاي ؟
حناطة : لا... مصلحة الضرائب ملهاش دعوة بالعفريت ، إحنا ح نحاسب من ينوب عنه ... الشيخ هدهد .
- أبو جابر : وح تحاسبوه على الثمانين مليون ولا على الربعميت مليون ؟
حناطة : لا طبعا على اللى الحكومة لمتته .
أبو جابر : بس هو ما أخذش أو مش ح ياخذ إلا ثمانين مليون .
حناطة : الأوراق الحكومية والمستندات والتقارير الضريبية بتقول إن المبلغ الإجمالى رعميت مليون .. ثم إنت شاغل بالك ليه يا معلم ... مش جايز العفريت تكون عينه فارغة ويسيب نص البلد ويتن ركب على النص التانى ويطلب فوس تانية ... وجايز نلاقى عفريت تانى جه ويطلب بنصيبه كمان .
- أبو جابر : (غاضبا) لا ماهو البلد كده ح تكون ملطشة للعفريت ، كل ما ينزلق أى عفريت فى قرشين يركب البلد يومين ويلف الثمانين مليون ويمشى ، لا ماهى مش أصول دى يا أستاذ حناطة البلد كده مش ح تستحمل .
- حناطة : مش ح تستحمل العفريت ولا البنى آدمين ؟
أبو جابر : لا ح تستحمل دول ولا دول .
حناطة : اطمنن يا معلم البلد بخير .
أبو جابر : معاك حق ... إنما قللى مين اللى ح يدفع الخمسة جنيهه ؟
حناطة : (يخرج ورقة ويقرأ) كل مصرى يسير على أرض مصر ويتنفس من هوائها ويشرب من مياهها كبيرا أم صغيرا حتى الجنين فى بطن أمه .
أبو جابر : (متعجبا) الجنين فى بطن أمه ... طاب ليه ... دا لا أكل ولا شرب ، دا جوه بطن أمه .
حناطة : هى دى الأصول يا معلم .
أبو جابر : أصول إيه وزفت إيه يا أختى .
حناطة : هى كل اللى بتعمله الحكومة مش للأجيال القادمة ، والجنين ده من الأجيال القادمة ... على كده لازم يدفع .
- أبو جابر : إذا كان الجنين فى بطن أمه بيدفعوه ... أمال لما يبجى للدنيا ح تعملوا فيه إيه ؟!
حناطة : (ضاحكا) ح نعمله ملف ضريبي .
أبو جابر : (صانحا) يا ولد يا رابسو ... القهوة والشيشة يا ولد أحسن دماغى ح يطير ... نفسك فى إيه يا أستاذ حناطة .
حناطة : (يدق على حقيبته) نفسى أعمل لكل مواطن فى مصر ملف ضريبي من ساعة ما يتولد

لحد ما يموت .

- أبو جابر : (ساخرا) ليه ... ما تعمله ملف ضريبي بعد ما يموت كمان .
حناطة : أنت بتقول فيها ... لازم يعملوا شريحة ضريبية وملف ضريبي للأموات ، إفرض الميت ده طلع له وراث أو ظهرت له أملاك .. حق الدولة يضيع .
- أبو جابر : (ضاحكا) يا أستاذ حناطة .. أنا بأسألك نفسك تشرب إيه ... الله يخرب بيت مصلحة الضرايب وبيت وزارة المالية وبيت وزير الضرايب .
حناطة : إهدأ يا معلم ما فيش وزير للضرايب ، إحنا بنتبع وزارة المالية ، وإن كان كلامك برضه فيه شئ من الصواب ، إيه المانع إن يكون فيه وزارة مستقلة للضرايب ولها وزير .
- رابسو : (يأتى بالقهوة والشيشة ويتناول قطعة الحشيش من أبو جابر) بس دى كبيرة قوى الليلة دى يا معلم
أبو جابر : ماهو كده وإلا دماغى يشت منى من اللى بأسمعه . (يخفض من صوته) أنا عايزك تجيب فنجان قهوة للأستاذ حناطة وتحط فيه سم هارى .
- رابسو : (مندهشا) وأروح فى داهية !!
أبو جابر : لا... ما أناح أقوم لك أحسن محامى فى البلد ، وح أبعثك كل يوم أكلة سمك معتبرة فى السجن ، ومش ح أنسى السلطات .
- رابسو : (ضاحكا) الله الغنى عن السمك والسلطات .
حناطة : (مستفسرا) إنتم بتتكلّموا فى إيه ؟
رابسو : (منصرفا) المعلم بيوصى لك على فنجان قهوة معتبر .
حناطة : شكرا لك يا معلم ياأبو الكرم والنزاهة . (يدخل كل من فرج وإبراهيم) فيه غرابين جايين أهم ح يحرموك من حجر المعسل يا معلم .
- أبو جابر : أما إنك حمار صحيح يا أستاذ حناطة ... هومين بيورد لى أحسن أصناف الحشيش إلا إبراهيم .
حناطة : (مندهشا) إزاي ده حراس الأمن بيوردوا ...
أبو جابر : بلا حراس بلا حرامية... إنت مش عايش فى الدنيا ... أهلا يا رجالة اتفضلوا ... ولد يا رابسو .
- إبراهيم : أهلا بالمعلم ... إزيك يا أستاذ مصايب .
حناطة : ليه كده يا إبراهيم ... أنا عارف إن دخلك كتير من بوفيه مديرية الأمن .. ممكن فى يوم تلاقينى فوق دماغك وأعملك ملف ، وأحاسبك عن مدة عشرين سنة .
- فرج : بس هو كان خارج مصر خلال المدة دى بيشتغل برة .
حناطة : ما لناش دعوة يا حبيبي ... حد ضربه على إيده وقال له أخرج ... البلد موجودة هو اللى خرج .
- فرج : (ضاحكا) سوى أمورك يا إبراهيم مع الأستاذ حناطة ، ولا الملف الضريبي تلاقيه فوق دماغك .
- إبراهيم : (يخرج شينا صغيرا من جيبه) بس كده ... خد يا أستاذ حناطة .. ظبط دماغك وح تشكرنى .
- حناطة : (مستفسرا) إهه ده ؟
إبراهيم : حة حشيشة .
حناطة : (مفزوعا) أعود بالله ... أعود بالله .. حد الله بينى وبينه .
- أبو جابر : (يأخذها) سيبه يا إبراهيم ، مالهوش نصيب تروح لصاحبها .
رابسو : (قادما يحمل المشاريب) أهلا بالمعلمين .
فرج : يا بنى إحنا مش معلمين .
- أبو جابر : والمعلمين أحسن منكم فى إيه . (ناظرا فى المشاريب) الله .. فين فنجان القهوة بتاع الأستاذ حناطة يا زفت ؟
- رابسو : (مضطربا) ما هو
أبو جابر : روح يا بغل هات القهوة .
حناطة : (خجلا) ما هو مش كل مرة يا معلم .

- أبو جابر : لا ماهو الفنجان ده ح يكون آخر فنجان .
حناطة : إيه أخبار الشيخ هدهد ؟
إبراهيم : دا عايش سلطان زمانه .
فرج : ما فيش حاجة بيطلبها إلا ويلاقيها تحت رجله فى نفس اللحظة .
إبراهيم : أنا قابلت الصول مصطفى بيقوللى إن فيه حراسة مشددة حول بيته ، وما حدش يقدر يدخله .
- أبو جابر : (ضاحكا) ليه خايفين من العفريت يخطفه .
إبراهيم : لا خايفين إن حد يخطف الشيخ هدهد .
أبو جابر : زى مين يعنى ؟
إبراهيم : بيقولوا أى جماعة من الجماعات الإرهابية ، أو الموساد ، أو حد عايز يضر البلد .
أبو جابر : وتفتكر الشيخ هدهد اللى ما بيشوفش قدام رجله ح يعرف
إبراهيم : (مقاطعا) لو تسمع الصول مصطفى واللى بيقوله عن الشيخ هدهد ...الواحد يقف قدامه على طول يعرف اسمه واسم ابوه ومراته وولاده وجيرانه .
أبو جابر : (ضاحكا) أظن بيعرف اسم الداية كمان ... يا سلام يا زمن !!
فرج : يا معلم دا شيخ مبروك ومكشوف عنه الحجاب . وإحنا معتمدين عليه إنه يخلصنا من العفريت اللى مشقلب حال البلد .
- أبو جابر : اللى محيرنى الفلوس .. مين اللى ح يخذها الشيخ هدهد ولا العفريت طبعا العفريت لا... لأن ح يعمل بيها إيه طاب العفريت ح يسبب البلد ليه ، إيه المقابل اللى ح ياخده ... أنا مثلا حاطط إيدى على حثة أرض ... يعنى راكبها ... هل أنا ح أسيبها كده بلوشى ... ثم إيه اللى خلى العفريت يركب البلد ؟
فرج : والله دا شغل الشيخ هدهد ... إحنا ما ندخلش فيه ، وبعدين الناس اللى فوق .عارفين هم بيعملوا إيه .
- أبو جابر : (يدخن) ما هو الشيخ هدهد بسلامته إن عرفيخلى العفريت يسبب البلد طاب ما بيعته يركب البلاد اللى إحنا مش طايقنها زى إسرائيل وأمريكا .. ولا البلاد دى العفاريت ما تعرفش تركيبها
- فرج : الظاهر يا معلم العفاريت ما تتشطرش إلا علينا .
إبراهيم : على رأيك والظاهر إن بلدنا من النوع اللى تتركب من العفاريت .
أبو جابر : بس لحد دلوقت بركات الشيخ هدهد ما ظهرتش .
إبراهيم : الرجل لسه ما لحقش يعمل حاجة .
فرج : ليه أنا سمعت أن الهرم الصغير بعد ما راح المقطم رجع تانى الجيزة .. والهرمين التانيين ظهروا بعد ما أختفوا لمدة تلت أيام وتوربينات السد العالى اشتغلت بعد ما اتعطلت يومين ، والطيارتين اللى اختفوا لقوهم فى مطار المازة بس ما لقوش الركاب لحد دلوقت .
- إبراهيم : والناس اللى بينزلوا من شققهم عريانين ملص فى نص الليل عددهم قل ، واللى بيمشوا على رجلهم وايدهم وبينهقوا بدأوا يمشوا على رجلهم .
فرج : بس بينهقوا برضه .
إبراهيم : والنسوان اللى بيطلعوا فى عز الظهر ويعضوا أى رجل يشفوه .
حناطة : بحق بيعضوا الرجالة فى تحت حساسة .
إبراهيم : مش بيعضوا تحت الحساسة دول بيقطعوها .
فرج : أنت ما سمعتش يا معلم أن صياد فى الأسكندرية اصطاد عروسة البحر ، واللى يحب يتفرج عليها يدفع عشرة جنيهه .
- حناطة : أنا سمعت أن فيه ناس صوروها وبيبعوا صورها الصورة بجنيهه .
فرج : وأنا سمعت أن أهلها طلغوا يدوروا عليها ورجعوها تانى .
أبو جابر : (مندهشا) أهل مين يا فرج ؟
فرج : أهل عروسة البحر .
إبراهيم : فيه أمير عربى كان فى الأسكندرية ، وعرض مليون جنيهه مهرها .
أبو جابر : (مندهشا) مهر مين يا إبراهيم !

إبراهيم	: عروسة البحر .
رابسو	: (قادمًا بالشيخة والقهوة) الشيخة يا معلم .
أبو جابر	: (راكلا الشيخة بقدمه) هو أنا عاد فيا دماغ .. الكلام ده حقيقى ... حرام عليكم معقول الكلام ده .
إبراهيم	: يا معلم إحنا بنجيب الأخبار من مصادر موثوق فيها .
فرج	: دى كلها بلاغات موجودة على مكتب مدير الأمن .
إبراهيم	: علشان كده هم ماسكين الشيخ هدهد وعاملين عليه حراسة مشددة .
أبو جابر	: أنا عايز أشوف الشيخ هدهد وأكلمه ز
إبراهيم	: أنت ممكن تكلم وزير الداخلية شخصيا ، وما تقدرش تشوف الشيخ هدهد دلوقت .
أبو جابر	: ليه ... ما كان متلقح طول عمره ... اللي عايز يقرأ الفنجان ولا يفك عمل ... ولا ..
إبراهيم	: (مقاطعا) دا كان زمان ... دلوقت الشيخ هدهد فى إيده مصير البلد كلها ... وفيه أوامر من الجهات الأمنية بان ما فيش حد يقرب منه .

(يسمع صوت انفجار مدوى ، عدد من النساء والأطفال يجرون هنا وهناك أمام المقهى ، والنوافذ تفتح ويطل منها النساء ثم يغلقنها وكذلك الأبواب يخرج ويدخل منها البعض)

صوت (١)	: العفريت ظهر فى شبرا .
صوت (٢)	: العفريت خطف واحدة وبنتها .
صوت (٣)	: برج الجزيرة اختفى يا جدعان .
صوت (٤)	: النيل غرق الزمالك .
صوت (٥)	: العفريت طايح فى الناس ضرب فى رمسيس .
صوت (٦)	: العفريت خلع السكة الحديد والقطارات اختفت .
جابر	: (ضاحكا) الناس اتجننت ... أى حاجة تحصل يقولوا العفريت .
أحمد	: الحاجات الوحشة بس .
جابر	: مش غريبة دى ... إن العفريت ما يعملش إلا الحاجات الوحشة ... إيه تفسيرك يا (رمضان) ، ولا ليسانس الفلسفة اللي إنت أخذته ما لوش رأى فى المسألة دى ؟
رمضان	: لما سير الحياة فى أى مكان يخرج عن الحد المعقول ، ويشعر الناس بالعجز عن فعل أى شئ ... مش غريب إن يكون العفريت يكون له مكان ، ومكان أساسى فى حياة الناس .
أحمد	: على كده أنت بتعتقد أن ما فيش عفريت .
رمضان	: العفريت دا فى عقل الناس بس .
جابر	: ومين اللي زرعه فى عقل الناس .
رمضان	: لا... قول مين اللي ساعد وشجع حكاية العفريت دى عند الناس .
جابر	: دا مين يا ترى ؟
رمضان	: المنول عن أفساد حياة الناس .
جابر	: على كده كلنا ساعدنا على نشر حكاية العفريت .
أحمد	: دا أنت ظالم يا أخى ... معقولة كلنا سبب فساد حياتنا ، طاب إحنا لا بنهش ولا بنش إيه دخلنا ؟
رمضان	: جابر معاه حق يا أحمد ... السلبية اللي إحنا فيها ممكن تكون أهم أسباب فساد حياتنا .
أحمد	: إحنا بايدنا إيه نعمله وما عملناهوش .
رمضان	: العجز عن العمل وعدم القدرة عن فعل أى شئ أخطر حاجة يمر بها الإنسان ، وبالنسبة للأمم دليل على احتضارها .
أحمد	: دا كلام نظرى ومسرف فى التشاؤم يا رمضان .
رمضان	: أبدا... هما مش متحفظين على الشيخ هدهد ، وإشاعوا إنه ح يمسك العفريت أو يطفشه .
جابر	: الناس عايزين كده .
رمضان	: الله... ما الناس بيعوزوا حاجات كثيرة مثلا الناس عايزين حرية وعايزين ديمقراطية وعايزين وعايزين ...اشمعنا استجابوا لطلب الناس بالنسبة للعفريت .

- جابر : تصور يا رمضان من كتر كلام الناس عن العفريت والأحداث الغريبة اللى بتحصل فى البلد
قربت أصدق ، وبدأت أسأل نفسى ليه لأ... مش جايز يكون فيه عفريت .
- رمضان : شوف يا جابر... لو العفريت مشى على قانون والتزم بيه ح يتحول إلى بنى آدم ، ولو
البنى آدم ما التزمش بالقانون يتحول على طول إلى عفريت
- أحمد : (ينهض) لا... دى باين الليلة ح تعمق فلسفة .. يا لا بينا إحنا قربنا من الفجر .
- جابر : وإنت ح تروح تعمل إيه فى البيت ؟
- أحمد : ومين قاللك إنا ح نروح ... تعالى نمشى فى البلد نشوف آخر أخبار العفريت .

(ستار)

قاعة واسعة في منزل الشيخ هدهد ، يجلس في مقعد وثير بجوار النافذة ، الستائر مسدلة .. ووسط القاعة مبخرة كبيرة الحجم يتصاعد منها سحابات الدخان ، مقاعد متناثرة بجوار الحائط ... الضوء خافت .. يتمم بأدعية وكلمات مبهمة وببده مسبحة ... يدخل فاصوليا .

- فاصوليا : (متلهفا) هيه يا مولانا ... مسكت العفريت ؟
 هدهد : (مبتسما) تعالى اقعد هنا جنبى يا فاصوليا ... شوف بأه .. إخنا عشنا يومين ولا فى الجنة .. ما حاجة طلبناها إلا وكانت تحت رجلينا .. أنا لو طلبت لبن العصفور ح يجيبوه ..والجماعة اللى كانوا معنا فى الحجز ... النسوان والرجال عايشين زى تنابلة السلطان ... دى أسعد أيام حياتهم ، ودلوقت إحنا دخلنا فى الجد ، الحكومة عايزة منى نمسك العفريت أو حتى نطفشه من البلد أو ن فك العمل .
- فاصوليا : طاب ومستنى إيه يا مولانا ؟
 هدهد : هم شاي لنا على كفوف الراحة ليه ؟
 فاصوليا : علشان العفريت .
 هدهد : طاب لو خالصناهم من العفريت .. إيه اللى ح يحصل لنا ؟
 فاصوليا : ح ننضرب بالصرم .
 هدهد : ألف جزمة على مخك النور .
 فاصوليا : أنت قصدك لا تمسك العفريت ولا غيره
 هدهد : أنا عايز أفهمك يا فاصوليا حاجة ... العفاريت أنواع زى البنى آدمين ، فيه عفاريت تافهة وضايعة وما لهاش أى قيمة .. صايعة يعنى .. دى اللى أنا بتعامل معاها ، ودول على قد حالهم ، إنما بينى وبينك أنا أول مرة أسمع على عفريت يركب بلد ... دا يا ولد يا فاصوليا لابد يكون عفريت جبار ... لو حد فكر ولا حاول يتصل بيه .. دا يكون يومه أسود من قرون الخروب .
- فاصوليا : طاب ماهو جايز ما يكونوش عفريت واحد ... يكونوا أكثر من عفريت .
 هدهد : دى ح تكون بلوى مسيحة على دماغنا ... هو أنا قادر أتعامل مع واحد لما ح أقدر أتعامل مع جملة منهم .
- فاصوليا : أنت حيرتني يا مولانا ... إنت مش عايز تمسك العفريت علشان ما يستغنوش عنا ، ولا أنت مش عارف تمسكه علشان هو جبار ، وإنت ما بتتعاملش إلا مع الفاريت الصايعة .
 هدهد : (يمد يده ويمسك رأس فاصوليا ويجذب رأسه برفق) شوف يا فاصوليا ... مهما كان العفريت جبار إنما لازم يكون له نقطة ضعف ندخل له منها .
- فاصوليا : طاب ما كده المسألة اتحلت .
 هدهد : إزاي يا ولد ؟
 فاصوليا : ادخله من نقطة الضعف .
 هدهد : هى فين يا حمار ؟
 فاصوليا : هى إيه ؟
 هدهد : نقطة الضعف .
 فاصوليا : ما تدور عليها .
- هدهد : يا فاصوليا أصل إنت مش فاهم ... علشان توصل للعفريت اللى قدر يركب البلد .. دى مشكله المشاكل .. وعلشان تعرف نقطة ضعفه دى مشكله تانية ... وعلشان تعرف تستغل نقطة الضعف دى .. تحتاج شهور وسنين ، وجايز تنجح وجايز تفشل .
- فاصوليا : (مفزوعا) يا نهار أسود ... طاب وبعدين دى البلد كلها معتمده عليك ،ومدير الأمن والمأمور والضابط ... دا لو حد عرف الحكاية دى شوية إنهم يعدمونا .
 هدهد : (يواسيه) ما تزعلش كده يا فاصوليا .. هومين اللى قال إن فيه عفريت ...إحنا ولا هما ؟
 فاصوليا : بس إنت قلت إنك ح تمسكه .
 هدهد : لا يا فاصوليا ... دول هما اللى قالوا لى امسك العفريت وخلص البلد منه .

- فاصوليا : (مفكرا) يعنى أنت ح تقول إنك ما عرفتش ؟
- هدهد : (ضاحكا) كل يوم أتأكد إنك حمار ... إنت متأكد يا فاصوليا إنك أصلكبنى آدم ؟
- فاصوليا : (يهرش فى رأسه) أنا طلعت على الدنيا لا شفت جدى ولا أبويا .
- هدهد : أحسن حاجة عملوها إنهم ماتوا قبل يتعاملوا معاك ولا يشفوك .
- فاصوليا : أنا بدأت أخاف يا مولانا .
- هدهد : (مفكرا) الأستاذ عباس فين ؟
- فاصوليا : حابس نفسه ورافض يكلم حد ، وطول الليل والنهار قاعد يقرا ويكتب .
- هدهد : (يضرب كفا بكف) لا حول الله ... ضيع عمره فى الكلام الفارغ ... المهم أنا عايزك تقول له إنى عايز أتكلم معاه فى موضوع مهم ، واقفل علينا الخلوة .. وما تخليش حد يدخل علينا .
- فاصوليا : حاضر يا مولانا .
- هدهد : (يكلم نفسه) الأستاذ عباس هو اللي ح يخرجنى من الورطة دي ، بس دا دماغه ناشف ، وما بيعرف يتفاهم ، بس ده هو الذى قدمنا دلوقت وهو رجل مثقف ، وإن كان الزمن ما هوش زمنهم ، بس دايمما بيكونوا على حق ، وإن كان ماحدش بيسمع لهم .
- عباس : (محمولا من فاصوليا محاولا أن يتخلص منه) سيبنى يا بغل ... أنا مش عايز أكلم حد .
- فاصوليا : (حاملا عباس) مولانا قال هاته يعنى هاته .
- عباس : (يتخلص من فاصوليا) أنا مش ح أتكلم مع دجالين ونصابين .
- هدهد : اقعدي يا أستاذ عباس ... أنا عايز اتكلم معاك كلمتين وبس . . . روح إنت يا فاصوليا واقفل باب الخلوة .
- عباس : (ساخرا) خلوة ... خلوة العفاريت والدجل .
- هدهد : شوف يا أستاذ عباس ، أنا بكلمة منى ممكن تروح وما حدش يقربلك .. بس قبل كده أنا عايز اتكلم معاك كلام جد .
- عباس : (جالسا أمامه) الشيخ هدهد يتكلم كلام جد إزاي ؟!
- هدهد : يا أستاذ عباس .. أنت صحفى وبتكتب وعایش بين الناس ويهمك أمر البلد .
- عباس : (متعجبا) غريبة إن الشيخ هدهد يقول الكلام ده !!
- هدهد : تفتكر يا أستاذ عباس إيه اللي قالب حال البلد بالشكل ده ..
- عباس : (منهارا) مش العفريت طبعا ، والله العظيم ما هو العفريت . وما فيش عفاريت . . . يا عالم ... يا عالم ما فيش عفاريت .
- هدهد : (محاولا أن يمسه به) الرجل عقله اتلحس خلاص ... اهدايا أستاذ عباس ، أنا معاك ، و ح أصدقك ما فيش عفريت .. طاب إيه السبب ؟
- عباس : الناس هم السبب .
- هدهد : (متعجبا) يعنى الناس عايزين يضروا أنفسهم بنفسهم !!
- عباس : أيوة ... لأن نص الناس مجانيين .
- هدهد : (ضاحكا) والنص التانى ؟
- عباس : مش عايشين دول ميتين .
- هدهد : (بنفاد صبر) وبعدين يا أستاذ عباس .. خلينا نتكلم كلام ناس عاقلين .
- عباس : أنا واحد من الناس بأعترف لك إنى مجنون ، لمجرد أنى بأقول للضابط والمأمور لما كانوا هنا إن ما فيش عفريت .. قالوا أنى مجنون وح أطلع من هنا على مستشفى المجانين .
- هدهد : ما تخذش على كلامهم .
- عباس : ليه ما هم اللي كلامهم مسموع فى البلد .
- هدهد : أستاذ عباس أنا ح أوافقك إنى ما فيش عفريت .. طاب البلد حالتها تتعدل إزاي ؟
- عباس : هما عارفين كويس حالة البلد تتعدل إزاي .. وممكن فى يوم أو أسبوع أو سنة تتعدل البلد .
- هدهد : أنا بأسألك إزاي إنت تعدل حال البلد لو كان الأمر بإيدك ؟
- عباس : (مفكرا) كده الحكاية عايزة تفكير .
- هدهد : (ساخرا) ما أنت طول عمرك بتفكر عملت إيه بالتفكير ... أنا بأسألك تعمل إيه .
- عباس : (يسير وسط المسرح مشية الواثق من نفسه) القانون يطبق على الكل ، بدون استثناء ولا مساس بالدستور .

- هدهد : (متوترا) الصبر منك يا رب أيوه وبعدين يا أستاذ عباس عدى حكاية القانون والدستور .
- عباس : إلغاء حالة الطوارئ فورا وبدون تأجيل ولا تسويق .
- هدهد : هو إحنا فى مظاهرة ... وبعدين يا أستاذ .
- عباس : كل اللى مالهوش تهمة ومسجون يخرج فورا ويندفع له تعويض .
- هدهد : ماشى ... خرجنا من مصلحة السجون .
- عباس : كل الشباب اللى متلطع على القهاوى والنواصى نجد له فرصة عمل حقيقية
- هدهد : عدينا من منظمة الشباب دى ..
- عباس : ممنوع أى زيادة فى الأسعار ... ونرفع مرتبات العنال والموظفين .
- هدهد : خلصنا من وزارة التموين دية ... إيه كمان .
- عباس : الضرايب المفروضة على الناس ، وكأننا فى عصور المماليك والعثمانيين اللى بيدفع
- هدهد : الضرايب دى الناس الغلابة ... والناس اللى معاهم ملايين بتدفع ملايين .
- هدهد : (بنفاد صبر) لا إحنا كده مس ح نخلص لو فضلنا نعدى على وزارة وزارة ومصلحة
- هدهد : مصلحة .. وبعدين يا أستاذ عباس وبعدين ... يا ريتك تختصر .
- عباس : احترام المواطن ، وتوفير ما يحفظ عليه آدميته ، والضرب على أيدي المفسدين مهما كان
- هدهد : موقعهم ، وعدم التزوير فى الانتخابات واصلاح التعليم ...
- هدهد : (متضايقا) أستاذ عباس ... هى الحاجات دى كلها ناقصة من البلد ؟
- عباس : دى مش موجودة أصلا .
- هدهد : على كده البلد مش موجودة .
- عباس : هو أنت مش شايف حالة البلد .
- هدهد : (يضع يده على عينيه) معلىش يا أستاذ العتب على النظر ... طاب هو أنت وبقية إخوانك
- هدهد : مش بيقولوا الكلام ده .
- عباس : اندبح صوتنا .
- هدهد : طاب وما بيتنفذ ليه علشان تتصلح حالة البلد .
- عباس : لأن قوى الفساد والهدم والخراب فى البلد أقوى من قوى الاصلاح والبناء والتعمير .
- هدهد : ليه يا أستاذ عباس ؟
- عباس : ليه إيه ؟
- هدهد : ليه القوى دى أقوى من القوة دكه ؟
- عباس : (مفكرا) مش عارف .
- هدهد : (واقفا) أهه إنتم كده يا مثقفين .. فى اللحظة المهمة تتنحوا وتقولوا مش عارفين .
- عباس : (مفكرا) دى مرحلة بتمر بها البلاد بتكون فيها قوى الافساد أقوى من قوى الاصلاح .
- هدهد : (جالسا) المهم ... هو ده اللى قالب حال البلد .
- عباس : أيوه .
- هدهد : وتفتكر لو كل اللى قلته ده اتعمل ح تتصلح حالة البلد .
- عباس : مستحيل .
- هدهد : (مندهشا) ليه يا أستاذ ... مستحيل ليه ... ليه التشاؤم ده ، وإيه المستحيل فى إن حالة البلد تتعدل .
- عباس : لا ... مستحيل اللى قلته يتنفذ .
- هدهد : ليه يا أخى ؟
- عباس : لأن فيه ناس من مصلحتهم يتن الوضع على كده ويزداد سوء .
- هدهد : والناس دول جبابرة للدرجة دى ؟
- عباس : أيوه ... وفوق ما تتصور .
- هدهد : وجابوا القوة دى منين ؟
- عباس : مش عارف .
- هدهد : يمكن عاملين عمل للبلد ولا مسلطين عفريت عليها .
- عباس : (غاضبا) أنا قلت لك ألف بلد ما فيش عفريت ... إنت ناوى تجننى .. أنا فعلا حاسس إنى

- اتجننت .. أنا مجنون ... خلاص أنا باعترف أنى مجنون . هدهد
- : مش حادة جديدة ... كل الناس بيقلوا عنك إنك مناخوليا . عباس
- : أنا عارف ده كويس .. قوى الفساد والشر بتتهمنى بالجنون ... وأنا عارف مصيرى . هدهد
- : طاب ما تقول بحكاية العفريت دى وخليك عاقل ذى الناس . عباس
- : مستحيل أكون سلاح فى إيد الفساد واعترف بالعفريت ... ما فيش عفريت .. ما فيش عفريت .. هدهد
- : خلاص يا أستاذ عباس المسرحية دى قربت على النهاية . أنا ح أخلى الولد فاصوليا يهربك من هنا .. بس قللى إنت ح تروح فين ؟
- : فى الصحرا .. عباس
- : ح تخضرها ولا إيه . هدهد
- : أنا مش عايز أشوف الناس زلا يشوفونى .. أنا ح اعتزل كل الناس وأعيش لوحدى ح عباس
- : أرجع إلى الحياة الفطرية النقية الخالية من الفساد . هدهد
- : على خيرة الله .. بس أوعى حد يعتر عليك .. يالا حضر نفسك . فاصوليا
- : (يدخل) هيه يا مولانا ... خلصت كلام مع الأستاذ عباس . هدهد
- : شوف يا فاصوليا وفتح لى ودانك .. أنا عايزك تهرب الأستاذ عباس من هنا من غير حد ما يحس بيك ... وبعد كده تهرب أنت . فاصوليا
- : (مندهشا) اهرب وأسيبك !! هدهد
- : أديك شفت يومين ولا فى الجنة .. وإحنا دلوقت دخلنا فى الجد ، ومدير الأمن والمأمور والضابط فؤاد أكيد ح يطبوا فى أى وقت ، وكل الأعدار أنا خلصتها ، وأنا عرفت ح أقول لهم إيه ، وح أعمل إيه .
- : طاب ما كده اتحلت خلاص . فاصوليا
- : لا ما الكلام اللي ح أقوله جايز يدخلنى السجن يا حمار . هدهد
- : (ببلاهة) ما تقلهوش . فاصوليا
- : برضه ح يدخلونى السجن .. المهم أنت تهرب الأستاذ عباس وبعد كده تهرب أنت . هدهد
- : ما تيجى تهرب معانا . فاصوليا
- : إنت اتعبط يا فاصوليا ... اهرب إزاي والبلد كلها عينها عليا . هدهد
- : (مترددا) ونصيبي من التمانين مليون . فاصوليا
- : (غاضبا) جاتك تمانين مليون نصيبة عليك وعلى أهلك ... يا ولد بأقولك يمكن يدخلونى السجن تقوللى نصيبي ... هو أنا أخذت حاجة ، حتى لو أخذت هم ح يسبونى روح يا فاصوليا وإبعث لى المخبر (فتحى) من بره . هدهد
- : (يعانق هدهد ويبيكى) أنت ح توحشنى ... أنا بأحبك زى أبويا وأكثر . فاصوليا
- : (يضحك) أبوك كان حرامى حلل نحاس يا فاصوليا ... وكان كل ما يسرق حلة يقبضوا عليه ... ومع كده ما بطلش يسرق ... يا لا مع السلامة ... ويمكن نتجمع تانى . هدهد
- : (يبيكى) أنا مش هاين على أسيبك ... أنا مستعد أفديك بروحى ... أنا مستعد أقتل مدير الأمن والمأمور والضابط .. بس إنت شاور لى . فاصوليا
- : (منزعجا) إيه يا فاصوليا ... إنت ح تعمل مدبحة هنا ولا إيه ... سيبيك من موال الارهاب ده أنا عارف إنك بتحبنى قد إيه ... والله أنا بأحبك كمان ... بس حب من غير قتل (يربت على كتفه ويمسح دمه) العشرة ما بتهونش إلا على ابن الحرام وإحنا عشنا عمر على الحلوة والمره هدهد
- : والله كانت أيامك كلها حلوة . فاصوليا
- : أيوة بأمارة ما كنت بتسرق التفاح والموز والبسبوسة من ورا ضهرى . هدهد
- : (ينحنى ويقبل يده) سامحنى لو كنت يوم قصرت فى خدمتك ... سامحنى . فاصوليا
- : ولد يا فاصوليا ... أنت فاكتر نفسك على خشبة مسرح ... خلاص يا بنى كده أنا ح أعيط . هدهد
- : خلاص إنت لو دخلت السجن أنا ح أقتل واحد علشان أدخل السجن وأكون معاك . فاصوليا
- : (متعجبا) ولد يا فاصوليا ... إنت انضمت لخلية ارهابية وأنا ما أعرفش ... إيه حكاية هدهد

القاعة الواسعة فى منزل الشيخ هدهد ، يجلس بجواره مدير الأمن ويقف على يمينه المأمور ، وعلى يساره الضابط فؤاد .

- هدهد : (يفرك يديه) دى دية شروط العفريت علشان يحل ويغور عن البلد .
- فؤاد : (منفعلا) بتقول إيه يا روح أمك ، إيه الشروط دى يا شيخ زفت (يتراجع) لا مؤاخذة يا سعادة الباشا .. لا مؤاخذة يا على بيه ... بس كلام الشيخ هدهد خرجنى عن وعى .
- على : (غاضبا) إنت يا رجل ... مين اللى لقحك علينا ... وجت لنا من أنه مصيبة .
- مدير الأمن : الرجل ده من أحزاب المعارضة .
- على : ويمكن يكون عميل لدولة أجنبية .
- هدهد : ليه ... ليه يا جماعة ... إنتم ضيوف فى بيتى .
- فؤاد : (منفعلا) بيتك .. بيتك إيه يا حبيبي .. دا أنا ح أهدمه فوق دماغك ودماغ أهلك
- (يتراجع) لا مؤاخذه يا سعادة الباشا ، لا مؤاخذة يا على بيه ... كلام الرجل ده خرجنى عن وعى .
- على : (يقترب من هدهد) أنت متأكد يا شيخ هدهد إن دية شروط العفريت علشان يترك البلد ؟
- هدهد : قصد سيادتك إيه ؟
- على : أصل الشروط دى بالضبط هى مطالب أحزاب المعارضة ومطالب النقابات ومطالب جمعيات حقوق الإنسان .
- هدهد : لا مؤاخذه ... يا على بيه .. أنا زى ما أنت شايف أنا رجل كفيف ، وماليش دعوة بالسياسة ولا الأحزاب ولا منضم للجماعات ولا حقوق الإنسان ... أنا جايز أتهور وأسمع موجز الأنباء فى قناة الجزيرة ، وجايز أسمع فضفضة الناس وأنا قاعد على القهوة أسايرهم ... إنما البلد دى بلدى ... وأنا باحبها بصدق لسبب بسيط إنى ح أندفن فى أرضها ، وقبل كده اتولدت عليها ، وأكلت من خيرها .
- فؤاد : أنت رجل نصاب ودجال وأفاق .
- هدهد : إنتم اللى جيتوا لحد عندى ، وأنتم عارفين إنى نصاب ودجال بالرغم من كده وضعتوا تحت إيدى تمانين مليون جنيه ، ووضعتم حراسة مشددة مش موجودة على بيت رئيس الوزراء .. وكل اللى طلبته كان مجاب .
- على : كنا فاكريتك بنى آدم تقوم تعرض علينا شروط فى منتهى الغرابة
- فؤاد : وإنت الصادق ... طلبات المعارضة والنقابات و...
- هدهد : (مقاطعا) والمطالب دى مش مطالب ناس ... إيه المانع إنها تتنفذ ؟
- مدير الأمن : دا مش شغلنا يا شيخ هدهد .
- هدهد : أمال شغلكم تمنعوا الناس إنها تقول اللى هى بتحلم بيه .
- على : لا .. دا إنت مش دجال ونصاب .. دا أنت متمرّد على النظام كمان .. وخطير على الأمن .
- هدهد : (ضاحكا) أنا ما أقدرش أمشى متر واحد إلا وواحد ساحبنى زى البهيمة ... ولا بنهش ولا بنش .
- فؤاد : مش لازم إنت اللى تنفذ ... ممكن تكون العقل اللى بيفكر ، وجماعتك هى اللى تنفذ .
- هدهد : (ضاحكا) تصور يا فؤاد بيه زعيم جماعة أعمى .
- فؤاد : لا ... ما فيه ناس عمى سوا الهوايل وقلبوا الدنيا .
- هدهد : (ساخرا) على رأيك ... وفيه ناس مفتحين بس زى قلتهم ما لهمش أى لزمة .
- فؤاد : إنت قصدك إيه وبترمى على مين ؟
- هدهد : أنا ما أقصدش حاجة ونهايته علشان تكتب اللى ح أقوله فى التقرير يا فؤاد بيه اللى ح ترفعه لعلى بيه ، واللى ح يرفعه للباشا مدير الأمن ... أنا فتحت المندل ، وفكيت العمل اللى كان معمول للبلد بالخبلان والدوخان وقلة الحيلة والتخلف والتأخر باقى العفريت اللى راكب على قلب البلد وهو مش ح يتزحزح إلا لما تنفذوا شروطه .
- مدير الأمن : (بصوت خافت) كلام الرجل ده إلى حد ما معقول ... نسبة الجرائم قلت فعلا ، وحالة

- الاضطراب والتوتر والاحتقان خفت إلى حد ما .
- على : أنا لاحظت ده فعلا .
- فؤاد : كل التقارير بتشير إلى كده .
- هدهد : أيوه ... بس مين يضمن إن الوضع ده يستمر... ممكن يرجع إلى أسوأ مما كان .
- فؤاد : (مندهشا) إنت سمعت اللي إحنا بنقوله !!
- هدهد : ما تشغلش بالك يا فؤاد بيه .
- على : (يقترب منه) على رأيك نضمن منين إن الحالة ما ترجعش أسوأ مما كانت عليه .
- هدهد : طبعا... ممكن اللي عمل العمل يعمل مرة ومرتين وتلاته ... وإنتم أكثر ناس عارفين إن البلد لها حاقدين وكارهين .
- فؤاد : وإزاي نمنع إن حد يعمل عمل للبلد تانى ؟
- هدهد : شوف يا فؤاد بيه .. الأعمال زى الأمراض ما تأثرش إلا فى الضعيف طالما الإنسان قوى ما فيش مرض يصيبه ، ولا عمل يآثر فيه ... وطالما البلد قوية وعفية ولا ألف عمل ولا ألف عفريت يقدر عليها .
- مدير الأمن : (ساخرا) وإزاي ح نخلى البلد قوية علشان ما فيش أى عمل يآثر فيها
- هدهد : (مبتسما) سعادة الباشا ... بتسأل رجل أعمى ونصاب ودجال .
- مدير الأمن : دى ما كنتش كلمة قلناها يا شيخ هدهد .
- هدهد : أيوه ... بس إنتم أكثر ناس تقدرنا تخلصوا البلد قوية وعفية .
- مدير الأمن : لا.... إنت مش نصاب ودجال ... دا أنت مصيبة كارثة .
- هدهد : أنا رجل كفيف غلبان على قد حالى .
- فؤاد : (ساخرا) لا بتهش ولا بتنش .
- هدهد : الله ينور عليك يا حضرة الضابط فؤاد وعلى فكرة فيه ترقية جيبالك فى الطريق قريبة جدا وح تنتقل .
- فؤاد : (مسرورا) والله يا شيخ هدهد ... الله يبشرك بالخير ... وح أنتقل فين . (يتراجع) بطل الحبتين دول ... وخلينا فى موضوعنا .
- مدير الأمن : (يقترب من الشيخ هدهد) قوللى بصراحة يا شيخ هدهد .
- هدهد : بصراحة وبكل صراحة .
- مدير الأمن : هو فيه عفريت بجد .
- هدهد : لو قلت لك إن ما فيش ح تصدقنى ؟
- مدير الأمن : (يسير وسط المسرح) أنا خايف تكون كدبة كبيرة وصدقناها .
- هدهد : أنتم نفسكم أكبر كدبة .
- مدير الأمن : (منتبها) بتقول إيه ؟
- هدهد : بأقول جازي الإنسان يكذب ويصدق كدبته .
- مدير الأمن : يعنى حكاية العفريت دى كدبة .
- هدهد : يجوز .
- مدير الأمن : أو حقيقة .
- هدهد : ليه لا .
- مدير الأمن : (غاضبا) يعنى أنت مش متأكد أنه حقيقة ولا كدبة .
- هدهد : لا... بالنسبة للعفريت أنا متأكد ... بس كلامه جازي يكون كدبة جازي يكون بيلعب بي .
- مدير الأمن : تقصد جازي يكون بيخدعنا .
- هدهد : ليه لا .
- مدير الأمن : وده أصول شغل .
- هدهد : هو الشغل مع العفاريات كده إحنا متعلقين بقشاية .
- على : معاك حق يا شيخ هدهد ... أنا قلت الكلام ده للضابط فؤاد .
- فؤاد : فعلا أنت قلت الجملة دى يا سلام يا شيخ هدهد وكأنتك بتقرا أفكارنا .
- هدهد : أنا خايف تكون تهمة مش مدح .
- مدير الأمن : أنت كده وضعتنا فى مأزق يا شيخ هدهد .

- هدهد : ليه يا سعادة الباشا ؟
- مدير الأمن : الشروط دي اللي أنت قلت عليها .
- هدهد : قصدك اللي قال عليها العفريت .
- مدير الأمن : ماشى .. اللي قال عليها العفريت مستحيل تتنفذ ومستحيل نطالب بتنفيذها .
- هدهد : ولا مازق ولا حاجة سعادتك ح تقول أنك اكتشفت أنى نصاب ودجال وما فيش عفريت ولا حاجة ويا بلد ما دخلك شر .
- مدير الأمن : (غاضبا) أنت فاكرك الحكاية بالبساطة دي .
- هدهد : أنا مش شايف اتهام أى إنسان بالنصب والدجل وسجنه فيه أى مشكلة .. حتى لو كان برئ ... ولا إيه يا سعادة الباشا .
- مدير الأمن : بعد ما أخبارك ملت الجرايد والقنوات الفضائية وتم رصد تمانين مليون جنيه .. والتقارير اللي رفعناها والبلد كلها مستتية تخلصها من العفريت نقول للناس إننا اكتشفنا إنك نصاب ودجال ... معقول الكلام ده !!
- هدهد : لا... معك حق يا سعادة الباشا ... دي فيها على الأقل إقالتكم من الخدمة ... ويمكن يكون فيها محاكمتكم كمان لأنكم ضللتكم الرأى العام واستغلّيتم سذاجة الناس و....
- على : (مقاطعا) فرحان يا خويا .
- هدهد : لا.... شمتان .
- فؤاد : شمتان فينا يا هدهد .
- هدهد : (مستدركا) لا.... شمتان فى العفريت .
- فؤاد : ليه ؟
- هدهد : لأن شروطه مش ح تتنفذ .
- مدير الأمن : إنما قللى يا هدهد ... العفريت مصلحته إيه إن الشروط والطلبات دي تتنفذ .
- هدهد : والله يا سعادة الباشا ... أنا فكرت التفكير ده برضه ... وسألت نفسى ياواد يا هدهد إيه مصلحة العفريت قامت قالتلى
- فؤاد : (مقاطعا) هى مين دي ؟
- هدهد : نفسى .
- فؤاد : وليه ما يقولكش هو؟
- هدهد : لا ... ما هو العفريت مش تحت أمرى ... أسأله وهو يجاوينى ... دا صعب جدا جدا إنك تسأله .
- مدير الأمن : أيوه ... إيه مصلحة العفريت إن حالة البلد تتعدل ؟
- هدهد : كأنك عارف أن تنفيذ الطلبات دي ح يعدل حالة البلد .
- مدير الأمن : لا يا حبيبى تنفيذ الطلبات دي ح يخلّى العفريت يترك البلد
- هدهد : (ضاحكا) طبعا مدير أمن البلد.... مين ح يقدر عليك ... المهم أنا لحد دلوقت مش عارف إيه مصلحة العفريت ؟
- مدير الأمن : طاب ما تسأله .
- هدهد : أسأل مين ؟
- مدير الأمن : العفريت يا بنى آدم .
- هدهد : يا سعادة الباشا دا عفريت راكب البلد كلها أنا ما أقدرش أسأله ولا غيرى يقدر ، هو يقول طلباته وشروطه بس .
- فؤاد : وقالها لك إزاي ؟
- هدهد : (ضاحكا) بالفاكس .
- فؤاد : صعبة دي شوية يا هدهد .
- هدهد : خلاص باعتها لى على النت .
- فؤاد : (ضاحكا) والله أنت ابن نكته .
- على : (جادا) وبعدين يا حضرة الضابط فؤاد أنت نسيت نفسك .
- على : (بنفاد صبر) خلاص يا سعادة الباشا ما فيش قدامنا إلا التوصية بتنفيذ طلبات وشروط العفريت .

مدیر الأمن	: (متضایقا) تنفيذ إيه بس يا على ... والله أنت ما عارف حاجة المطالبة بتنفيذ الطلبات دى خارج اختصاصنا وخارج قدرتنا .
على	: والحل .
مدیر الأمن	: ما فيش إلا حل واحد .
على	: إيه هو ؟
مدیر الأمن	: إن الشيخ هدهد يحاول أن يتفاوض مع العفريت ويتنازل عن بعض الشروط .
هدهد	: لا .. ما هو سعادتك ما تعرفش إن مبدأ التفويض مرفوض أصلا من حيث المبدأ عند العفاريت .
مدیر الأمن	: حاول يا هدهد إحنا مستقبلنا ومصيرنا بين إيدك .
على	: مصير البلد كلها .
فؤاد	: وترقيتي ونقلى كمان .
هدهد	: (يضع قدما فوق الأخرى) والله يا جماعة طلبكم عزيز على وأنا ما أقدرش أكسر بخاطركم بس أنتم عارفين يعنى تحكيمات العفريت .
على	: البركة فيك يا هدهد .. وإحنا معتمدين على الله وعليك .
مدیر الأمن	: والله لو قدرت تخلى العفريت يتنازل عن بعض الشروط والطلبات ح يكون لك مكانة كبيرة عندنا .
على	: أيوه والله يا هدهد وده جميل عمرنا ما ح ننساه لك .
فؤاد	: الشيخ هدهد مش ممكن يتخلى عننا وإحنا محتاجين له ... مش كده يا شيخ هدهد (يركع على ركبتيه) والنبي ما تكسر بخاطرنا .
هدهد	: والله يا جماعة انتم صعبانين على أنا ح أحاول ... ولكن ما أوعدكمش بحاجة أصل انتم ما تعرفوش التعامل مع الفاريت صعب لدرجة كبيرة .
مدیر الأمن	: (منصرفا) يا لا يا على ... يا لا يا فؤاد نسيب هدهد باشا يشوف شغله .
على	: وأنا ح أمر أن ما حدش يزعجك وكل طلباتك مجابه يا هدهد باشا .
فؤاد	: أنا بنفسى ح أقف على الباب وح أكون فى خدمتك يا باشا .
هدهد	: والله يا جماعة أنتم بتركبوني ذنب كده ... بس علشان خاطر عيون مدير الأمن ، وغلاوة المأمور ومعزة فؤاد بيه أنا ح أحاول ح أحاول ...

(ستار)

المشهد الرابع

كوخ مهجور على طرف الصحراء يظهر امتداد الصحراء من خلف الكوخ ... نبات الصبار وبض الصخور هنا وهناك المسرح يتغشاها ظلمه ... يخرج عباس من الكوخ ومعه مصباح مضاء ... يجلس على صخرة ، يتأمل المكان حوله ... الرياح تصدر أصواتا غريبة ومخيفة .

عباس : (ينفخ فى يده محدثا نفسه) أول ليلة أقضيها هنا ، أنا ح أقضى بقية عمري هنا لا ح أكتب ولا ح أقرأ ... (تلفت حوله) أنا حاسس إنى مش لوحدى ... حاسس بوجود آخر معيا ... يمكن ده بسبب الأصوات الللى بتعملها الرياح ... أنت خايف ولا إيه يا عباس (يذهب ويجئ ويتلفت) لا أنا خايف مش ح أكذب على نفسى ... بس خايف من العفريت ما فيش عفريت (يضحك) فىن أنت دلوقت يا شيخ هدهد ... والله دا رجل طيب (يجلس) ما فيش عفريت بس ممكن يكون فيه كائنات تانية لا هى من البنى آدمين ولا هى من العفريت .. ما فيش حاجة تنفى الاحتمال ده (يقف متشجعا) وما فيش حاجة تثبت الاحتمال أنا ح أدخل أنام (يدخل وبعد قليل يخرج) كده أنا ممكن اتجنن من أول ليلة ... ما هو مش ممكن مكان واسع بالشكل ده ما يكونش فيه كائنات إلا العقارب والتعابين ... أكيد فيه حد عايش هنا ، وأنا حاسس بيه بيراقبنى ... بيعد حركاتى وأنفاسى ، طاب الحاجة دى لو موجوده ما تظهرش ليه (يذهب ويجئ ويقف فى المنتصف) يا عفريت أو أى كائن تكونه ، إن كنت موجود اظهر اكشف عن نفسك إعلن عن وجودك ما فيش حد موجود غبرى ، وأنا زى ما أنت شايف أعزل وضعيف ، إن ما ظهرتش فأنت جبان وما فيش قدامك إلا أنك بكل صراحة عن هزيمتك ما فيش حد موجود وما يحبش يعلن عن وجوده ، إعلن عن وجودك اظهر لى .

(يحدث انفجار.. السماء تبرق وترعد المكان يهتز الرياح تهب وتزجر . ويتصاعد سحابات دخان من جهة اليسار ... وشينا وشينا يتكشف عن عدد من الأشخاص يرتدون عباءات سمراء وحمراء ويضعون أقتعة مخيفة على وجوههم ، يتقدم شخص مميز عنهم فى ملبسه يظهر أنه كبيرهم)

كبيرهم : (يتقدم) أهلا يا أستاذ عباس أنستنا .
عباس : (مذعورا يتراجع) أنتم مين وتعرفونى منين ؟
كبيرهم : (ضاحكا) أنت من لحظة كنت بتنادينا (يقلده) إن كنت موجودا اظهر اكشف عن نفسك ، إعلن عن وجودك ... ما فيش حد موجود ما يحبش يثب وجوده (ضاحكا ويخطر بالمكان) أنت ناديت واحد ... بس إحنا كنا فى مهمة ، وإحنا مارين سمعناك بتنادى ... جينا كلنا لأننا ما نقدرش نفترق عن بعض .
عباس : (مذعورا) أنتم مين أنا ما أعرفكمش .
كبيرهم : بس إحنا عارفينك كويس وعاملين لك ملف عندنا .
عباس : بس أنا ما عملتش حاجة وما أعرفكمش .
كبيرهم : (يتحرك بخيلاء فى المكان) آه ... لا مواخذه أنا قمتش بعملية التعارف .. اسمح لى أن أعرفك (يصفق) اصطفوا لنبدأ حفلة التعارف (يلتفت إلى الواقفين) إيه يا جماعة هى حفلة درديحى ولا إيه ... أنا بأقول حفلة تعارف ... ومعانا ضيف شرف... الأستاذ عباس .
امراة : (تتقدم فى رشاقة وجمال وتزيح ستارة عن مائدة فى جانب المسرح عليها أصناف عديدة من الأطعمة والفواكه وأنواع من الشراب ويضاء المسرح بأضواء متألئة) أمرك يا زعيم . ولزوم الشئ يا فتنة .
كبيرهم : (تضحك بإغراء وتصفق) تؤمر يا زعيم (تعزف الموسيقى وتنساب الراقصات وخلفهن فتنة)
كبيرهم : (يشير إلى عباس ليجلس على مقعد وثير) اتفضل يا أستاذ عباس ... ما تخفش ما حدش ح يمسك بسوء .
عباس : (يجلس مذعورا ممسكا برأسه) عرفتكم أنتم العفاريت أنا كنت غلطان آه غلطان .

- ومش عيب إن الواحد يغلط .
- كبيرهم : (يخطر في المكان بين الواقفين والواقفات) أنا عايزك تسترخى وتاكل وتشرب وتستمتع بالموسيقى والجمال والرقص أنت ضيف شرف الحفلة زى ما قلتلك (تقترب امرأتان من عباس) فتنة ... إغراء ... سيبوا الأستاذ عباس .. ابعدوا عنه دلوقت .
- فتنة : أصله دمه خفيف يا زعيم .
- إغراء : وهادى وحلو يا روح أمه .
- كبيرهم : اسمح لى أعرفك بنفسى أنا الفساد الأكبر . (الجميع يصفقون وينحنون له ، وتعزف الموسيقى تحية له مع مصاحبة الراقصات والمعنيات) يا جماعة بلاش تصفيق عايزين الحفلة تعدى فى فوضى وهرجلة (ينظر إلى شاب يقف فى الصف) .. أنت واقف غدل فى الصف ليه يا انحراف ... دى مش عادتك .
- انحراف : (ينحرف عن بقية الواقفين) لا مؤاخذة يا زعيم .
- الفساد : إحنا ح نبدأ بالسيدات الأول (يشير إلى نساء واقفات) دى (فتنة) واللى بعدها (إغراء) ، واللى مش طايقة نفسها دى (أنانية) ، واللى هناك دى المكسوفة المدارية (خيانة) ، ودى اللى عماله تترعش (شهوة) تعالوا كده السيدات على جنب ... أما الشباب ... دا معروف من شكله (انحراف) والأثنين الواقفين جنبه المبهدلين المزروتين (اهمال) و (تسيب) ، بعد كده الثلاثة الواقفين جنب بعض (كذب) و (تضليل) و (تزوير) ... بعد كده بالترتيب .. (كره) و (طمع) و (حقد) والأستاذ المتأنق الواقف لوحده ده (نفاق) .. (يبحث) هم راحوا فين كانوا هنا دلوقت .. أه ... فى الركن البعيد دايمًا مختلين ببعض (غرور) ومعاه (غش) ، واللى وراهم (مكر) و (جشع) . (يخطر أمامهم) دول كلهم حبايبى ما أقدرش أعيش من غيرهم ... وما أقدرش أستغنى عن واحد منهم .
- عباس : (مذعورا) لا لا ... أنا جايز بأحلم ، لا ده مش حلم دا كابوس ... أو إبنى اتجننت ، أكيد أنا اتجننت وعقلى المريض بيصور لى اللى أنا شايفه دلوقت ... كثير اتهمونى بالجنون والظاهر كان معاهم حق .
- الفساد : (يقترب منه ويضع العصا على كتفه) أنت لا بتحلم ولا اتجننت ... انت صاحى وفى كامل قواك العقلية .
- عباس : (يتكور وينزوى فى مقعده) أنتم مين ...؟ مين أنتم ؟

(ضحك وهرج ومرج من الواقفين وكل منهم يتحرك على سجيته)

- الفساد : مش ممكن ح أقوم بعملية التعارف تانى إحنا ورانا شغل كثير .
- عباس : (مترددا وخائفا) هو هو هوانتم عفاريت ؟
- (يتجمعون ويحاولون الهجوم على عباس كل منهم يريد الوصول إليه ... يشير الفساد بعصاه فيرجع الجميع)
- الفساد : لا.... الأسماء ما تهمناش ... اعتبرنا عفاريت ، شياطين ، بنى آدمين ، مخلوقات من كواكب أخرى ... إحنا أهم حاجة عندنا الفعل ... ومش أى فعل والسلام أفعال تدمر تكسر تقلب تهيج تولع تحرق .. إحنا أمراء الدمار والظلام .
- عباس : أنتم اللى بدمروا حياة الناس ، بتحولوها ألى جحيم .
- فتنة : دى مش حفلة تعارف ، دى حفلة تكريم لنا .
- إغراء : على رأيك ... دا كلام الأستاذ عباس أوسمة على صدورنا .
- الفساد : (يجلس بجواره) شوف يا أستاذ عباس إحنا عندنا عيب كبير مش قادرين نتخلص منه وهو بالنسبة لكم ميزة ... طبعا المعايير مقلوبة عندنا ... أنت فاهم الحكاية دى العيب اللى عندنا إننا ما نقدرش ندخل بلد أو بيت أو مؤسسة أو وزارة إلا بعد البنى آدمين يسمحوا لنا ويتحايلوا علينا ، بعد كده ندخل وننتشر فى البلد ...
- عباس : (يقف ويدور ممسكا رأسه) لا أنا مجنون خلاص أنا فقدت عقلى عقلى أنا فقدته .
- فساد : خلينا نكمل حفلة التعارف ، وح أسيب كل واحد من حبايبى وأصدقائى الأعزاء ح يحكيك

- على عمله وبعض انجازاته ، وبعد كده نتعشى وننبتسط ... اتفضلوا يا جماعة .
- فتنة : (تستعرض جسدها الفاتن) أنا زى ما أنت شايف (تقترب منه وتمسك يده وتضعها على جسدها) وزى ما أنت عايز (بيتعد) أنا باخلى البنى آدم يعشق النساء المنصب المال ، ويضحى بكل شئ فى سبيل أنه يوصل للى أنا أشاور له عليه ، وأنسيه كل حاجة ، وأربطه بخيط من حرير ناعم وجميل ، وأخليه يروح فى كل مكان أنا عايزاه ... وكل اللى أنا بأعمله علشان حاجة واحده بس ... علشان الزعيم يرضى عنى .
- اغراء : (تتمايل وترقص مظهره مفاتنها) زى ما بيقولوا عندكم .. الممنوع مرغوب .. وأنا بأقول الممنوع مغرى ممتع جميل حلو ناعم ، وبأزيه ... وشوية .. شوية مقاومة البنى آدم تضعف وتضعف لحد ما أدخله فى بحورى وأغرقه .
- أنانية : (تمسك مرآة وتنظر فيها) أنا مش ح أقدر أقول أقدر من كده ... أنا بأحب نفسى أكثر من أى حاجة تانية ... أنا بأحس إن الدنيا دى مخلوقة علشانى .. علشانى أنا بس ، ... مش كده وبس دى الدنيا كلها فى خدمتى ... الوحيد اللى أنا فى خدمته هو زعيمنا .
- الفساد شهوة : وأنا ما أقدرش استغنى عنك لحظة واحدة يا حبيبتي . : (ترتعش) ما فيش حاجة فى الدنيا أنا ما بحبهاش ، المتعة هى حياتى ، ومش أى متعة ، المتعة اللى تخلى البنى آدم يتزلزل ويترعش زى كده .. ويفقد اتزاناه وما يعرفش يتصرف ولا يفكر .
- انحراف : (يقفز فى الهواء ويجرى هنا وهناك) حياتى ممتعة كلها تجديد وتغيير ، طول ما أنا ماشى فى البلد كل حاجة أعوجها ، الاستقامة نوع من الرتابة والملل .. أنا بأجعل حياة الإنسان مبهجة ، كل يوم كل دقيقة مفاجآت تغييرات .. لا بد للإنسان أن يجرب كل حاجة ... يجربنى ... ويوم ما يجربنى عمره ما ح ينسانى ... جربنى يا أستاذ عباس ... حاول كده ... حاول ..
- عباس التسبب : (يهرب منه) ابعده عنى ابعده الله يخرب بيتك . : أنا أكبر أعدائى القانون والنظام على فكرة أسوأ اختراع اخترعه الإنسان ... طول عمرى بأحارب القانون والنظام ما بأجهوش حنفيات البلد كلها فى كل مكان مفتوحة على الفاضى ليل نهار ... لمبات النور ... أموال الدولة مباحة للصوص والحرامية ، كل واحد ياخذ اللى هو عايزه ، وما فيش مانع أسهل الطلوع بره علشان يمتع نفسه ... ما أجمل الفوضى ... ويا عيش زعيمنا .
- النفاق : (يسير معجبا بنفسه) أنا معشوق الجماهير ... كل الناس بتحبنى ... انا المرأى اللى يبص فيه أى إنسان يشوف اللى هو عايزه ... إن كان حمار يشوف نفسه عبقرى ، إن كان حرامى يشوف نفسه ولى من أولياء الله الصالحين ... عندى القدرة أنى أخلى الزبالة بستان مليون بالزهور والرياحين .. وطبعاً أنا ما أقدرش استغنى عن أخى وتوأم روحى الكذب .
- الكذب النفاق الحقد : وأنا ما أقدرش أنكر جمالك على . : (ضاحكا) يا سيدى يدوم الكره والبغض بنا دائما . : (ينطلق من الخاف إلى الأمام) أوعى يا جدع أنت وهو ... أنا نار عمرها ما بتتنطفى ... مش ح استريح إلا لما العالم كله يولع ... واليوم ده لا بد ح ييجى .. طبعا بمساعدة أصدقائى الأعراء .. الجشع والطمع .
- الجشع : (يحمل كما عظيما من الفواكه وزجاجات الشراب حتى أن جيوب رداناه منتفخة بأنواع الأطعمة) بعد الإتحاد المصغر اللى إحنا عملناه أنا وأنت وصديقنا الطمع ... أمنيتك المدمرة دى ح تتحقق .. بس نفسى تقنع التزوير والخداع .
- الخداع : أنا مرتبط زى ما أنتم عارفين من زمان بالتزوير ، وحاولت اقناعه أن ينضم لكم بس انتم عارفين التزوير ما يحبش يظهر فى الأماكن العامة ، وما بيحبش حد يشوفه
- الفساد : (يسير وسط المسرح بفخر وزهو) ما اتحرمش منكم ، وكل واحد يحقق أسوأ الأمنيات أشر الطموحات .. (يلتفت إلى عباس) إيه رأيك فينا يا أستاذ عباس ؟
- عباس : (يتأمل الجميع) لا ... لا ... مش ممكن اللى أنا بأسمعه ده ... أنا فى مستنقع الرذيلة والانحلال ... أنتم كلكم عايشين فى البلد و..... .
- الفساد : (مقاطعا) لا ... دول أمراء الشر بس ، وكل واحد من الواقفين قدامك تحت إيداه العشرات ،

- دول عليهم التفكير والتخطيط ... اما العشرات فعليهم التنفيذ .
- عباس : (يسير بحذر بينهم متأملا كل فرد) كلكم موجودين في البلد !!
- الفساد : (ضاحكا) معشعشين في البلد .
- عباس : على كده اللي بيحصل للبلد مش غريب .
- الفساد : الغريب أن بلدكم لسه موجودة ... رغم المجهود الجبار اللي ببذله ليل نهار ... بس إحنا كنا فين ...
- عباس : (مندهشا) بتقول البلد لسة موجودة !!
- الفساد : شايف الصحراء اللي وراك دي ... اللي ما تقدرش توصل بنظرك لنهايتها ... دي كانت مدن عامرة ، وفيها اللي ما يتسماش ... اللي مش عايز أقول اسمه .
- عباس : (مستفسرا) إهه هوده...
- الفساد : أنا ما أقدرش أذكر اسمه ... والحاجات الثانية المتفرعة عنه .
- عباس : مش فاهم حاجة .
- الفساد : أنت حمار ... ما هو لابد تفهم ... أنا ما أقدرش أنطقه .
- عباس : إيه .. هو ... هو فيه حاجة ما تقدرش عليها .
- الفساد : حاجات كتيرة ما نقدرش عليها .
- عباس : زى إيه ؟
- الفساد : (بدون شعور) زى الخير والصلاح .

(صراخ وهياج ، البعض يرتمى على الأرض ، والآخر يمسك رأسه ... ومنهم من يتلوى ، والبعض يقفز قفزات هستيرية ... الجميع يتجهون إلى عباس مادين أذرعهم)

- الفساد : (يدور وسطهم) شر.. ظلم .. خداع .. دمار ... انحلال ... ما فيش فائدة ... صعب أنهم يرجعوا لحالتهم .
- عباس : (مندهشا) إيه اللي حصل دا لمجرد أنك نطقت كلمة
- الفساد : (غاضبا ومقاطعا) ما تنطقش الكلمة دي تانى ... بتعمل تغيير كيمائى فى كيانهم فيروس ممكن يقضى عليهم .
- عباس : دي مجرد كلمة !!
- الفساد : أكثر حاجة بنكرها والكلمة دي بالذات من آلاف السنين وإحنا بنحارب عايزين نقضى عليها نمحيها من ذاكرة الإنسان (ينصرف ويشير للآخرين) إحنا ما لناش قعاد هنا ... السهرة انتهت ...
- عباس : (يتجرأ ويتقدم منهم) أنا عرفت أنتم مين دلوقت ... أنتم زى ما قال الشيخ هدهد ... عفاريت .. بس مش العفاريت اللي كنا بنسمع عنها فى الحواديت .. انتم نوع تانى من الكائنات ... انتم فيروسات ... وباء ... فى الهواء والأرض والمية ... الناس بتتنفسكم وبتمشوا فى دمهم وعروقهم مكانكم فى قلوبهم وصدورهم ونفوسهم وأنت بنفسك يا فساد كشفت لى عن أهم سلاح علشان نحاربكم به .. الكلمة ... الخير العدل ... الصلاح ...

(تصرخ الكائنات وتتلوى وتحاول أن نسد أذانها ... وتتجه إلى عباس ... ويتقدم الفساد منه محاولا أن يسد فمه)

- عباس : (محاولا أن يهرب منهم) الصدق الإخلاص الجمال .. السلام الأمانة ... الصراحة ... الحب ... الحرية . (تتلاشى الكائنات شيئا فشيئا وتتسحب من المسرح وتختفى مظاهر الاحتفال وتستبدل الأضواء الحمراء الساطعة بأضواء عادية) اكتشفت السلاح اللي حارب به العفاريت وح أطردهم من البلد ... ح أظهر البلد منهم ... الشوارع والحوارى .. والمصانع والمدارس والغيطان ... جوه الناس (يدخل الكوخ ويخرج حاملا أشياءه) أنا راجع ومعايا سلاحى ح تروح منى فين يا فساد ... وأنت يا نفاق ... ويا انحراف وراكم وراكم يا عفاريت الفساد ولدمار .

(س ت ا ر)